

Kraiso Jonén Wakmwaek Korop naenámp Ankank Érik Yéncépámp Kar

Mekia Akwapnámp Kar

Jisas pok tenánko, 60 a, 65 yopwar niamp arake fek, mao éréképá yárákimp aróp Jono apár amor ke Patmos mek kalabusi yak nánko, Kwaro man ninik tokwaeráp yém yéncép.

Am yém te Kwaro kápae kare ankank wakmwaek korop naenámpan yéncép námpon. Am ke fek te, Kwarén mér monap aróp fárákapao Kristen fákáreran touwe kwatae nénk napantá, am fárákapamp méran kárákáre sánkria, Jono mámá buk kumwi námpon.

Mámá buk fek te wakmwaek korop naenámp ankankan sénámp kápae kare wounáp kar am mek yak námpon. Wounáp kar fi kor te aránon: Jisas Kraiso te tokwae karara, maomp yae kor fek Kwaro kápae kare yopor aróp apárok tirá néria, Satanén kor apárok anámpá pap naenámpon. Tá Jisas am takia pwar nánko, Kwaro koumteouráp aróp kárákáre fek foukouri yakápi napan éréképeanánko, wourékam némpouk yae-párak kare yakáp mwanapan sénámpon.

1 ¹Mámá buk fek yaknámp kar te wokwaek mek wouroumpeyakámpan Jisas Kraiso érik farákáp námpono. Kwaro am kar Jisas Kraisen mao náráp tére aropan, ankank koupour érik farákárano yéncépaeria sánk námpon. Mao Kwaromp tére aróp Jon ononampok náráp ensel sámp-kérép nánko, mao te onan am ankank táman yéncépria sénámpon. ²Ono am ankank wae nkea nampan am Kwaromp kar Jisas Kraiso yéncép námp táman érik farákáp nampon. Mámá kar te kare karon.

³Arop mámá Kwaromp ankank wakmwaek korop naenámpan sénámp kar nkea farákáp konap, tá aróp mámá profet kar wawi konap, tá aróp mámá kumwi tenámpaok i konap, am aróp fárákap ponankoran Kwaro ourour sánk naenámpon. Am te apae riteanápe, am ankank korop naerianámp ke te oukoumwan Kwaro wae séri námpara, mao ankár tak naenámpon.

Jono fákánek sios mek kar kumwirá nénkámp kar

⁴Ono Jon ono mamá kar kukumwia provins Esia mekamp fákánek sios mek yakápnap koumteouráp arop, yumonapok tirá kérép rae. Onomp ninik te, Kwar oukoumwan yak námp, tá wokwaek kar yakámp, tá nánkár wakmwaek kor yaká yak naenámp, mao fwap námokuráp ninik fek yumwan ninikia yaewourria yonkwae porokwe nénkanoria nampon. Tá Kwaromp tére mwaria nánapnap fákánek spiritaó Kwaromp sia king éntér mwaek yakáp i konap, mao yumwan takanáponoria nampon.

⁵Tá Jisas Kraís te Kwaromp kar ponankor yae-párák farákáp konámp aropono. Mao te manénkir sumpwia fárámpea, mao apárokamp king fárákapamp Tokwae Kar yak námpon. Onomp ninik te am yininkaopwe támao yumwan ninikria yonkwae porokwe nénk mwanapon. ⁶Aeriaka mao nomwan maomp Naropwar Kwaromp pris tére mwanámp káká pwar nánko, Kwar námoku te nomp King yak námpon. Maomp e tokwae, tá kárákáre tokwae te ankár yaká yak konámpono. Am te kareno!^a

⁷Yumo nkenk! Mao te koumwe mekia ék nánko, arop ponankor fwap mao námokuráp yi kare fek nke mwarea napon. Arop ponankor man oump fek faropap, tá nil fek pukupap, mao kuri nke mwanapon. Tá apárokamp kápae kare fi arop maniap táman ninikia, apae maorianria yonkwae touweria éménka wae mwarea napon. Ye! Am te waeman kare kar tak mwanapon.^b

⁸Kwar Tokwae Kar kárákáre tokwaerápao arakrá sénámpon: “Ono manénkir kar yak, tá wakmwaek kar yak nampon.” Am Kwar támao oukoumwan yak, wokwaek kar yak, tá nánkár wakmwaek kor yaká yak naenámpon.

Jono Kraiséen nkenámp kar

⁹Ono Jon ono te yiráp ankwapnápono. Nomo énéni Jisasomp aropono. Nomo énéni nomwan sápnap touwe sámp konámpon. Nomo énéni Kwaro taokeyak konámp fi mek yakáp námpono. Tá nomo ponankor touwe sámpea kárákáre fek fokopeyakáp i konámpono. Ono Kwaromp kar farákápria, tá ono Jisasén mér namp farákáp nampono. Aenanko, am fek táman onan fákapea santukupea solwara aokokwampianánko, yaknámp apár amor ke kánanke Patmos mek páte napo yak nampon. ¹⁰Jisas Tokwae Karamp yae Sande fek, Yiki Kor Spirit onan oupouroup nánko, am fek táman onomp younkwe mwaek arop kar niamp tékén wumwi nánko maok, am te wur kar niamp.^c ¹¹Aenáno am karao sérrá, “Ponankor ankank amo nke nap te, amo ankár buk fek

^a 1:4-6 Kl 1:17-18; 1 Pi 2:9; 1 Jo 1:7; Yé 4:5; 17:14; 20:6 ^b 1:7 Mt 24:30; Jo 19:34,37; Ap 1:11 ^c 1:10 Jo 20:1,19,26

kumwia fákánek sios mek tirá kérépampo. Amo Efesus mekamp sios mek, tá Smerna mekamp sios mek, tá Pergamum mekamp sios mek, tá Taiataira mekamp sios mek, tá Sardis mekamp sios mek, tá Filadelfia mekamp sios mek, tá Leodisia mekamp sios mek arakrá tirá kérépampo.”

¹²Tak nánko, ono am onan kar sénámp aropan nke naeria sámp-arákár. Ono sámp-arákarea nke nanko, fákánek lam gol tankáp. ¹³Tá ono nke nanko, arop ankáránkamp am lam ou mek yak. Am arop te Aropamp Táráp niamp. Mao te waempyam tokwaeri^d yirimp tenánko, pikia pu kor yarápae fek tank nánko, am waempyam fek tapek parák gol^e yumuntuk yirimp tenánko yak. ¹⁴Maomp me pwae te sipsip pwae niamp wupwi^f kor kareria, tá kouwme wupwi niamp arake. Tá maomp yi te yaomwi yurunk niamp.^g ¹⁵Maomp pu kor te yaomwi tokwae mek yankapramp bras^h waentar niamp. Tá ono maomp kar wa nanko te, ént tokwaerao souroukoup námp niamp. ¹⁶Mao te fákánek térme yae-párák mwaek tia fákeyak, tá bainat énékér mwaek wirápa waenámp maomp táp mek yakámp érik akár koropá yak. Maomp yimetáp te yámarao kárákáre fek tákapa waenámp niampono.ⁱ

¹⁷Aenángo, ono man nkea mao pu páte yak námp fek wonae fik piká párákapea wae arop sumpwi konámp niampi yak. Aenampan maok, mao náráp yae-párák mwaek yae onomp pourouk papria sérrá, “Amo te apápi kwaponono. Ono manénkir kar yakamp, ono wakmwaek kar kor yak nampon. ¹⁸Tá ono yiki yak konampono. Wokwae ono wae sumpwiampan maok, amo nkeae. Oukoumwan te ono yiki yaká yak nampon. Tá ono sumpwi mwanap ménkiamp ki, tá sumpwi aropamp némpoukamp ki te ono fákeyak nampon. ¹⁹Aenampara, amo ankár mámá ankank oukoumwan yak námp nke nap, tá wakmwaek korop naenámp ankank nkeria kor kumwiampo. ²⁰Amo wae mámá fákánek térme onomp yae-párák mwaek yak nánko nke naponono. Tá mámá fákánek lam gol nke naponono. Am te kar mek yak námpono. Tá am fi te ará: Am fákánek térme te fákánek siosomp ensel fákáre, tá fákánek lam te am fákánek siosono.”

Efesus mekamp siosnámпок sámp-kérépámp kar

2 ¹Am arop warko ankwap kar arakrá sér, “Amo ankár Efesus mekamp sios fákáreramp enselén kar ankwap kumwia sámp-

^d **1:13** ‘Waempyam tokwaeri’ ran ninik mwanámp te, pris tokwae, tá profet, tá king, arake pourouráp arop tokwaerao yirimp konapan Jisaso kuri takeniamp arop tokwae yak námpan yéknéprá yirimp námpon. ^e **1:13** ‘Gol’ te kingomp e tokwaeran wounáprá Kwaromp waentar kwapweran yéknép námpon. ^f **1:14** ‘Me pwae wupwi’ te ‘Yak sorokwap kor aropamp me korokamp wupwi pwae niamp’rá sénámpon. ^g **1:14** ‘Yi yaomwi yurunk niamp’rá sénámp te, Jisasomp yi te sios mek kápae kare ankank ponankor nkeria, ankákáránk aropamp kwatae ninikan kor nkea yopor námpan yéknép námpon. ^h **1:15** ‘Yaomwi tokwae mek yankapramp bras’ te Kwaro kwatae ninikráp koumteouráp aropan kot naenámp kárákáre tokwaeran yéknép námpon. ⁱ **1:16** Hi 4:12; Yé 19:15,21

kérépampo. Am kar te ará: ‘Ono te onomp yae-párák mwaek yae te térme fákánek ti-samp yak, tá fákánek lam gol ou mek yáarak i konampao, ono amwan mámá kar sámp-kérép rae:

²Amo ponankor apae-apaenap ninik, tá waráp tére tokwae nap, tá amo kárákáre fek fokopeyaknap ninik te am te ono wae méri yak nampon. Tá amo kwatae niniknap aropan warákár mo kare napan kor wae mér nampon. Am arop fárákap amwan arakrá sér, “Yino kuri aposelono.” Aenapan maok, mao te aposel mono. Amo wae am fárákapamp kar youroukoupia am fárákapamp kwekárnap ninik nkea wae mér naponon.^j

³Arop fárákap te amo onomp e sámp-fákeyak napan nkea, am fek amwan touwe kwatae nénk napon. Aenapo amo am táman kokwae mo, am touwe sámpea kárákáre fek fokopeyak konaponon. Am te ono wae mér nampon.

⁴Aeno ono amwan kar arakrá sénae rae: Wokwae amo wourékam mérap ke fek te, amo onan warákár kariapan maok, oukoumwan te mo naponon. ⁵Wokwae te amo kwapwe kare ninikiapan maok, oukoumwan te am ninik am pwate naponon. Aenapara, amo ankár wokwaekiap táman warko ninikia, oukoumwan kor kwatae ninik pwararea am kwapwe kare ninik fek akwapampo. Táte amo tak moria kwatae ninik younkwek sir mo napo te, ono amonapok koropea waráp lam warko pwarokwap nanae.^k ⁶Aeno amo oukoumwan fákeyaknap yae-párák ninik te Nikolasomp firaonap kwatae ninik monoria yopor i konap te, am te kwapwe karenono. Ono kuri monoria yopor i konamponon.

⁷Ae konampara, arop waeman woupwirápara, mámá Yiki Kor Spiritao sios fákáreran farákápnámp kar má fwapia wa kuno. Táte arop yorowar kwe-pwarari námp te, ono fwap ‘Takaerá sénanko, arop yiki yak sánk konámp yaoamp ki fwap sámpea fánaenampon. Am yao te yámar mek Kwaromp yopwar mek yak námpon.’^l

Smerna mekamp siosén sámp-kérépámp kar

⁸Tá am arop warko ankwap kar arakrá sér: “Tá amo ankár Smerna mekamp siosomp enselén kar ankwap kumwia sámp-kérépampo. Am kar te ará: ‘Ono manénkir kar yak, tá wakmwaek kar yak namp aroponon. Ono wokwae wae sumpwiampan maok, oukoumwan te yiki yak nampao, ono amwan mámá kar sámp-kérép rae.

⁹Amwan touwe korop námp, tá amo ankank moráp arop yak nap te ono wae mérampon. Aenampan maok, ono nke namp te, waráp waemp te Kwaromp ankank kápae kareráp námponon. Amwan Juda ankwap fárákapao wouroump sénap te ono wae mér nampon. Am arop fárákapao sérrá, “Yino te Juda fi mekamp”rá sénapao maok, mao te Juda fi kare mono, Satanomp arop fi kare támaono.^m ¹⁰Nánkár wakmwaek tae morok

j 2:2 1 Jo 4:1; 2 Jo 1:7-11 k 2:5 Yé 3:3 l 2:7 Stt 2:9; Yé 22:1-2,14 m 2:9 2 Ko 11:13-15

yumwan touwe sánk mwanapan maok, yumo táman apápi kwaponó. Yumo wawenk! Satano yumwan poupwékápria yumo yiráp méran mokop nap nke nae ritea arop ankwap fárákap tia fápákamánk naerámpon. Aenánko, yumo touwe sámprá tukupea fére-sámpramp yaeⁿ fek mwanapon. Aeno amo ankár Kwarén mér nap kárákáre fek sámpá yakrá akwapea amwan sámp-wouroumpnap ke fek napo kor, fwaponó. Ono amwan foporakorria manénkir kámákár akwap námpo sámp konámp ankank niamp yiki yak sánk nanampono.^o

¹¹ Aenanampara, arop te waeman woupwirápara, ankár Yiki Kor Spiritao sios fákáreran farákápnámp kar mómá fwapia wa kuno. Táte aropao yorowar kwe-pwarari námp te anánk sumpwiraó man sámp mo kareno.’”^p

Pergamum mekamp siosén sámp-kérépámp kar

¹² Tá am arop warko ankwap kar arakrá sér: “Tá amo ankár Pergamum mek yaknámp siosomp enselén kar ankwapmwaek kumwia sánkampo. Am kar te ará: ‘Ono te bainat tokwaeri énénkér mwaek wiráp kare námp sámp-fákeyak nampao, amwan mómá kar sámp-kérép rae.’^q

¹³ Ono waráp némp te wae mér nampon. Am némpouk Satano king yoroi yak námpono. Aeno amo onont kárákáre fek yakria, waráp mér nap mek wouroump mo i konaponó. Wokwaek am arop Antipas onomp kar farákáp konámp arop mao te amont yakria, onomp karwaok karrá tére nánko, yiráp Satano poukeyak námp am némpouk am fek am arop fárákapao man sámp-wouroumpaponó. Aeapan maok, amo am fek onan mér nap pwar moiaponó.

¹⁴ Aeno ono amwan kar ankwapmwaek sénae rae: Amont arop ankwap fárákap Pergamum mek kwatae profet Balamomp ninikan sámpea kárákáre naponó. Am te ará: Mao wokwaek ankwap fi mekamp king Balakén Israel fi mekamp aropan kwekárá kwatae ninik fek tukup mwanap yénk naenámpria yénképeanánko, am Israel fi ponankor taki naponó. Am te ará: Balak Israel firan, kwekár Kwarén ofainap nape fépérria, tá kokopor ninikaok tukupenkrá kwekárimpono.’^r ¹⁵ Tá taknámp arop ankwap fárákap amont yakáp nap am fárákap te Nikolasomp firápamp kar sámpea mántwaok paokop napon. ¹⁶ Aenapara, amo ankár kwatae ninik younkwek pwarampo. Táte amo tak mo napo te, kánanke kwarok ke fek amonapok koroepa ono amont onomp táp mek yaknámp bainat fek yorowar nanae.^s

¹⁷ Aeno arop te waeman woupwirápara, Yiki Kor Spiritao sios fákáreran farákápnámp kar mómá fwapi wa kuno. Táte arop yorowar kwe-pwarari

ⁿ 2:10 ‘Fére-sámpramp yae’rá sénámp te, ‘Fae tákáre ke fekia pwar naenámp’rá sénámpon.

^o 2:10 Lu 22:31-32; 2 Ti 4:8; Je 1:12; 1 Pi 3:4 P 2:11 Yé 20:14; 21:8 Q 2:12 Hi 4:12

^r 2:14 Nam 25:1-9; 31:16 S 2:16 Yé 19:15; 22:12

námp te, ono man yámar mekamp fir ankwapmwaek mek yak námp nénk nanampon. Tá ono man woupwi kor yumwi sánk nanampon. Am yumwi te ono e wourékam am fek kumwi tenanko, arop ankwap am e mér mono. Arop yumwi sámp námp mao saráp mér naenámpon.’^t

Taiataira mekamp siosén sámp-kérépámp kar

¹⁸Tá am arop warko ankwap kar arakrá sér: “Tá amo ankár Taiataira mekamp siosomp enselén kar ankwap kumwia kérépampo. Am kar te ará: ‘Ono te Kwaromp Táráp, tá onomp yi te yaomwi yurunk niamp, tá onomp pu te bras waentar kwapwe niampao, ono amwan mámara kar sámp-kérép rae:”

¹⁹Amo apae-apae nap ninik ponankor ono wae méri yak nampono. Amo arop fárákapan warákarrá, tá amo onan mér, tá amo arop fárákapan yaewourrá tére nap te, ono wae mérampono. Tá amo kápae kare touwe sámpea kárakáre fek fokopeyak nap te, ono wae mér nampon. Tá nkwakwe make ninik amo manénkiri nap, am te kwapwe karean maok, oukoumwan nap támao kwapwe kare kareno.

²⁰Aeno ono amwan oukoumwan mámara kar sénae rae: Amo mámara yupu Jesebel taki yakanoria pwate napo, amont yak námpono. Am yupu te arakrá sér i konámpon, “Ono te profetono.” Aerá sénámpao maok, mao te onomp tére konap arop fárákapan kwekárará, kokopor i konap ninikaok tukuprá, tá kwekár kwarén ofa sánknape fépér mwanap ninikaokenkria yénc námpono. ²¹Ono te mao kwatae ninik am younkwek pwaranoria ankwap ke yépék nampan maok, mono. Mao te am kokopornámp kwatae ninik te younkwek sir mo námpono. ²²Aenámpara, wawenk! Ono am yupuan touwe sánk nanampono. Tá am arop fárákap méntér kokoporrá paokop napo kor, am kwatae ninik younkwek sir mo napo te, am fárákapan kor touwe tokwae sánk nanampon. ²³Maomp wakmwaek tukupnap aropan kor tirá wour nanampon. Aenanampara, sios ponankor wae mér mwanapon: Ono te ponankor aropamp ninik mek youroukoup karia fákeyakrá, ono nopok yumwan ankákárankrá aminap puri fek, take pourouráp touwe nénk nanampon. ²⁴Aeno ono oukoumwan yumo ankwap fárákap Taiataira mek yakápap koumteouráp arop yumwan sénampono: Yumo am karwaok mo, tá yumo am ‘Satanomp ninik mek kar tukupenk’rá sénap mér mo nap, yumwan ono arakrá sér rae: Taknap arop fárákap yumwan te ono warko ankwap tére am yumuntuk pap mo, fwaponno. ²⁵Aeno ponankor ankank yumo ti-sámp nap te, ankár sámpá kárakárerá tukupea ono koropnamp ke fek kipo. ²⁶Táte arop yorowar kwe-pwar, tá mao onomp ninikaokrá akwapea mao sumpwiria pwarnámp ke fek nángo te, ono man kárakáre sánk nanko, mao fwap arop fi ponankor taokeyak naenámpon. ²⁷Tá mao

^t 2:17 Yé 3:12 ^u 2:18 Yé 1:14-15

fwap ain yaopwae sámpea am fek kápae kare arop fi kárákáre fek poukwap námp te, aropao kwar fek yoroinap sospenan porokwapá fouria tiri yui sir konap niamp naenámpon. Am tére ono man sánk nanamp te onomp Naropwaro onan koumteouráp arop poukwapaeria sáp námp niampono.

²⁸Tá ono man térme Wap Kumur sánk nanampono.” ²⁹Aeno arop te waeman woupwirápara, ankár Yiki Kor Spiritao sios fákáreran farákápnámp kar má fwapia wa kuno.’ ”

Sardis mekamp siosén sámp-kérépámp kar

3 ¹Tá am arop warko ankwap kar arakrá sér: “Tá amo ankár kar ankwap kumwia Sardis mek yaknámp siosomp enselompor sámp-kérépampo. Am kar te arakono: ‘Ono Kwaromp fákánek Spirit sámp-fákeyak namp, tá fákánek térme samp nampao, ono amwan mámá kar má sámp-kérép rae:

Amo apae-apaenap ninik ono wae méri yak nampono. Arop fárákapao amwan arakrá sér, “Mámá sios te fwap yiki yak námpon.” Aerá sénapan maok, mono, amo wae sumpwi yak naponno. ²Aenapara, amo te ankár amp nap pwarará fárámpae! Waráp kápae kare kwapwe kare ninik te oukoumwan fwap yak námpao maok, wae pwar naeria wae námp am amo ankár kárákáre fek fákeyakampo. Am te apae riteanápe, ono nke nanko, kápae kare amonap ankank te onomp Kwaro nke námp fek ankwap ankárankamp yae-párák kare mono. ³Amo wokwaek mámá Kwapwe Kare Kar wawia wae sámpapono. Aenapara, amo ankár táman warko nikia mántwaokria kwatae ninik younkwek pwarampo. Táte amo fárámpria ampi tenap pwarará fárámp moia te, kánánkámp oukun naeria yáraknámp aropao i konámpnámp, ono amonapok korop nanko, amo ono korop naeramp ke mér mo nanape.”

⁴Aeno amo te wae arop ankwap yinink oukoumwan Sardis mek yakáp nap maomp waempyam sámpá oumi pap moi naponno. Aenapara, am fárákap te fwap waempyam wupwi kor yiriria onont tukup mwanap pwi naponno.^x ⁵Táte arop yorowar kwe-pwarari námp te, ono man take pourouráp waempyam wupwi yirimpá papria, maomp e yiki yakáp mwanapamp Buk fek yaknámp te torokor mo, fwaponno. Ono fwap maomp e onomp Naropwaro nke námp fek, tá maomp ensel fákáre nke nap fek érik farákáp nanampono.’ ”

⁶Aeno arop te waeman woupwirápara, mao te ankár mámá kar Yiki Kor Spiritao sios fákáreran farákápnámp kar má fwapia wa kuno.’ ”

Filadelfia mekamp siosén sámp-kérépámp kar

⁷Tá am arop warko ankwap kar arakrá sér: “Tá amo ankár kar ankwap kumwia Filadelfia mek yaknámp siosomp enselompor sámp-kérépampo.

▼ 2:26-28 Sng 2:8-9; Yé 22:16 w 3:3 1 Te 5:2 x 3:4 Lu 10:20; Érik 22-23 y 3:5 Mt 10:32

Am kar te arakono: ‘Ono yiki kare yakria ono kare kar ninik fi kor kareno. Ono te Devito sámp-yakámp ki sámp-fákeyak nampono. Ono ménki kikip nanko te, arop ankwap ankárankampao warko ménki kér mono. Tá ono ménki kéri tenanko te, arop ankwap ankárankampao warko kikip mono. Ae konampao ono amwan mámá kar má sámp-kérép rae:^z

⁸Amo apae-apaenap ninik ono wae méri yak nampon. Aeno amo nkeae! Amo nke nap fek ono ménki kik-pwate nanko yak námp te, arop ankwapao fwap kér naenámp pourou mono. Ono wae mér nampon: Amo te waráp kárákáre oukoumwan kánanke yak námp fek, onomp karwaok akwapria, apae-apae koropánk nánko, amo onan mér nap pwar moi napono. ⁹Amo mámá arop fárákap Satanomp firápaó ‘Yino te Juda fi mekamp’rá sénapan maok, mao te Juda fi monap wae mérapono. Aenapan maok, am fárákap te kwekár sérarrá, kwatae ninik fek paokop napono. Aeno amo wawae! Ono am fárákapan sénanko, waráp pu wonae fik me kor woukourria ono amwan warákár kare namp mér mwanapon.^a ¹⁰Amo onomp karwaokria amo amwan koropnámp touwe ponankor sámpea kárákáre fek fokopeyak napono. Aenapara, ono fwap amwan taokeyak nanko, am kápae kare apár mekamp ponankor koumteouráp aropan mokop nap nke naerianámp ankank korop námpao kor, amwan te korop mo fwapono. ¹¹Ono amonapok koupour kar korop nanae. Amo sámp-fákeyaknap kwapwe kare ninik te ankár kárákáre fek fákeyakampo. Takria amo nopok sámp nanap ankank arop ankwap waráp kwapwe kare ninik kwe-pwarará, sámpantáno.^b

¹²Táte arop yorowar kwe-pwarari námp te, onomp Kwaromp Yiki Kor Nap oumpwarani kwapnámp sámp-fokop tenanko, mao te am yiki kor nap pwarará, warko ek akwap mo kareno. Ono fwap man onomp Kwaromp e, tá onomp Kwaromp taun e, maomp pourouk kumwi nanampono. Am némp te Jerusalem wourékam, am te onomp Kwaronámpoknámp yámar mek pwararea ék naenámpon. Onokump wourékam e táman kor maomp pourouk kumwi nanampon.^c

¹³Aeno arop te waeman woupwirápara, Yiki Kor Spiritao sios fákáreran farákápnámp kar mámá fwapi wa kuno.’ ”

Leodisia mekamp siosén sámp-kérépámp kar

¹⁴Tá am arop warko ankwap kar arakrá sér: “Tá amo ankárLeodisia mekamp siosomp enselén kar ankwap kumwia sámp-kérépampo. Am kar te ará: ‘Ono te kare kar fi kor yaknamp arop, ono Kwaromp kar ponankor yae-párak kare kare kar farákáp nampono. Ono te Kwaro ponankor ankank yoroinámp fi korao ono amwan mámá kar má sámp-kérép rae:^d

^z 3:7 Ais 22:22 ^a 3:9 Ais 60:14 ^b 3:11 Je 1:12 ^c 3:12 Yé 14:1 ^d 3:14 Kl 1:15; Yé 19:11

¹⁵Amo apae-apaenap ninik ponankor te ono wae méri yak nampono. Ono wae mér nampono, amo te námpare mo, amo te touwe fokor mono. Onomp ninik te amo fwap námpare yak nanap, tá amo fwap touwe fokor nanap.^e ¹⁶Aenampan maok, amo te touwe fokor kare mo, tá námpare kare mono, amore mek námpare tae morok napono. Aenapantá ono te amwan táp mekamp ak-sinae rampono. ¹⁷Amo te arakrá sér i konapon: “Ono te wae mani tokwae, tá ankank kápae kare tank nampon. Ono te ankank ankwap mo namp yak mono, ponankor fwap pwi nampon.” Aerá sénapao maok, mono. Amo kwatae kare yak napo, arop fárákapao amwan aropomp mwanap pourou námpon. Amo te ankank moráp arop yakria, yi wurumpi yakrá amo pourou mwar waempyam yirimp mo, yak napao maok, amo am te mér mo napon.^f ¹⁸Aenapantá ono amwan mámá ninik sánk rae: Onomp gol te yaomwi mek yankapea nanko yiki kwapwe námpono. Amo fwap am táman mani fek sámpea amo fwap mani tokwaeráp arop yak nanapono. Tá amo fwap waempyam wupwi mani fek sámpea waráp pourouk oupourouk napo, arop fárákap fwap amo pourou saráp yak nap nke mo napo, amo fwap pwarápa mo nanapono. Tá amo fwap gris marasin mani fek sámpea waráp yi mek papea, fwap nke nanapono.^g ¹⁹Táte ono ankwap arop fárákapan warákár namp kwamp te, am fárákapamp ninik kwatae fwapokwap naeria am fárákapan yopor i konampono. Ae konampara, amo ankár amoku i konap ankankan ninikia am ankank kwatae te younkwe mwae sirampo.^h ²⁰Amo onan nkeae. Ono ménki fek fokopeyakrá poporokwaprá yak nampon. Táte arop ankwap onomp kar wuri wawia onan ménki kik-pwar nánko te, ono am mek youmpea am aropént yakria, tá ono méntér fár, tá mao onont fánaenampon.ⁱ ²¹Táte arop yorowar kwe-pwarari námp te, ono fwap man sénanko, onont onomp sia king fek tank naenampon. Am te wokwaek ono kuri yorowar kwe-pwararea onomp Naropwarént maomp sia king fek tank namp niamp taknámp naenampon.^j

²²Ae naenampara, arop te waeman woupwirápara, Yiki Kor Spiritao sios fákáreran farákápnámp kar má fwapi wa kuno.’ ”

Yámar mek Kwarén lotunap kar

4 ¹Am kar wae pwar nánko, ono yámar mek nke nanko, ménki ankárankamp kikir akwap nánko, am meknámp arop kar wur fokop námp niamp ono manénkir wawi namp niamp, take fek onan sérrá, “Amo narek mapek aokae! Ono amwan wakmwae koropánk naenampon ankank yénc nae.” ²Aeránko maok, ankár kar Yiki Kor Spirit onomp pourou mek kárákárea wae nánko, ono yámar mek nke nanko, kingomp sia

^e 3:15 Ro 12:11 ^f 3:17 Lu 12:21; Je 2:5 ^g 3:18 Ais 55:1 ^h 3:19 Hi 12:7 ⁱ 3:20 Jo 14:23
^j 3:21 Mt 19:28

ankárankamp tank. Aenánko arop ankárank am sia fek tank.^{k 3} Aenánko maomp wae te mani tokwae fek sám̄p konap yumwi jaspa waentar niamp, tá noumouri kor yumwi konilian niamp. Tá am fek fou yimprámp niampao sia king fek koropea arákari kimpá yak nánko, am te yiki kor yumwi emeral niamp pourouráp nke nampono.^{l 4} Tá am fek nke nanko 24 sia am sia king tokwaeran ikir tankáp nánko, arop taokeyakáp konap arop 24^m sia fek tankáp. Am arop taokeyakáp konap aropamp pourouk te waempyam wupwi yiriria, maomp me korok gol fekamp kump woukouria tankáp. ⁵ Am sia king feknámp mékér wae te fápákár akwap nánko, tá maomp pourouk tokwae te oukurér párákapnámp niamp. Am sia wonae fik te fákánek sarom wae yakáp. Am sarom te Kwaromp fákánek spiritan wounáp námpon. ⁶ Am sia king wonae fik te ankwap ankank ént solwara tokwae niamp yak. Aenánko, am te glas mek nke napo, koukwe kwapwe konámp niampono.

Tá yiworaopwe ankank yiki yakáp nap amore mek yakápria am sia king wonae fik ikir yakáp. Am yiworaopwe ankank yiki yakáp nap kápae kare yiⁿ éntér mwaek, tá younkwe mwaek kuri oupouri yak.^o ⁷ Ankárankamp ankank yiki yak nám̄p te laion niamp. Anánk ankank yiki yak nám̄p te bulmakau touroup niamp. Yinink ankank yiki yak nám̄p te maomp yimetáp te arop niamp. Yiwor ankank yiki yak nám̄p te ant tu tokwaerao narek furukarea yárák nám̄p niamp.^{p 8} Am yiworaopwe ankank yiki yakáp nap te am ankákárank námoku te tokwampok yowe pwaerápono. Tá kápae kare yi am fárákapamp pourouk oupoupouri yak nám̄p te pu-pwaek kuri yakáp, tá mek kuri yakáp námpon. Tá yámarao, tá kumuruk kuri am fárákap te arakrá sér i konapono:

“Kwar Tokwae Kar te
ponankor kárákáre tokwaeráp,
mao te yiki kare,
mao te yiki kare,
mao te yiki kare.
Mao te wokwae kar yak,
tá oukoumwan yak nám̄p,

^{k 4:2} Ais 6:1 ^{l 4:3} Ese 1:28 ^{m 4:4} Arop ankwapao arakrá ninik i konapono: ‘Arop taokeyakáp konap arop 24’ te, ankwap 12 te Jekopomp tárápu éntér-sámpramp mwearoan wounáprá, tá ankwap 12 te éntér-sámpramp aposel fákáreran wounáprá. Takia tapokwapea te 24no. Kwar te arop ponankoramp Kwarono. Sapta 21:12,14 fek yaknám̄p karan mént nkeae. ^{n 4:6} ‘Kápae kare yi’rá sénámp te, yérékrá yakáprá pwar mo, tá ninik kour tokwae karrápono. ^{o 4:6} Ese 1:5-10 ^{p 4:7} Arop ankwap fárákap arakrá ninik: Kwaro yoroimp ankank ponankor man lotu i konapono: Yao pwaek mekamp fir ou mekamp fir tokwae kwapwe, tá aropao poukwap napo tére konap fir ou mekamp kárákáreráp fir, tá ant ou mekamp koupour kar furukur konámp, tá ankank ponankor taokeyak konámp yonkwae kourráp arop.

tá nánkár wakmwaek kor yakea korop naenámpon.”
Am fárakapao makrá sénap te anepér mo i konapono.⁹

⁹Am yiki yakápnap ankank te yiki yaká yaknámp Kwaro sia king tokwae fek tank námp táman warákárria man loturia, maomp e narek sampokrá ‘Aesio’rá sér i konapono. Tá kápae kare por am yiworaopwe yiki yakápnap ankank tak nap te, ¹⁰am 24 arop taokeyakáp konap fárakap támao kor, Kwaro sia king tokwae fek tank nánko, wonae fik pourou méntér éntér mwaeknámp tukupá pér i konapono. Tá am fárakap man lotu nap te, mao yaká yaknámp aroponoria napon. Aeria am fárakap náráp gol fekamp kump sia king tokwae tanknámp wonae fik épéria sérrá,^r

¹¹ “Tokwae Kar! Amo yinomp Kwarono.
Amo támao narek karaok yak napo,
amwan kápae kare aropao warákárria
waráp e narek sampokria,
waráp kárakáre ankore mek yakáp mwanap te
wae pwi kare yak námpon.
Am te apae riteanápe,
Amo ankank ponankor yoroia napon.
Amoku waráp ninik fek yoroia napo,
am ankank ponankor oukoumwan yak námpon.”

Jono buk ankwap moukoupramp nkenámp kar

5 ¹Kwaro sia king fek tankea, maomp yae-párak mwae yaek buk ankárankamp sámpá tank nánko nke nampono. Am te pu-pwae, tá éntér mek kuri kumwi tenapo yak námpono. Tá am buk te fákánek éntu torompia fápákamánkia pwate napono. ²Tá ono nke nanko, kárakáre kor ensel ankwap tékén arakrá wumwi, “Kwapwe kare arop te wa máma buk fekamp torompi tenap éntu má kwaráp naenámp fwap pwi námpon?” ³Yámar mek kuri tak naenámp arop ankwap yak mo, apárok kuri yak mo. Kwar ankore mek kuri am buk aokoroepa am buk mek nke naenámp te yak mo kareno. ⁴Ono nke nanko, arop fárakap te am buk fwap aokorop-pwar naenámp arop nke mo mwanap pourou námpantá, ono táman yonkwae touweria éma wae nampono. ⁵Aenáno arop taokeyak konámp arop ankárankao onan arakrá sér, “Amo émi kwapono. Amo nkeae! Juda fi meknámp laion korop námp te, mao king Devitomp arák fekamp taonono. Mao te waeman yopor aropan yorowaria kwe-pwarará apárok anámpá pap námpara, mao fwap am buk fek éntu fákánek ke fek torompiramp kwaráprá fupukuraerá akwap naenámpono.”

¶ 4:8 Ais 6:2-3 ¶ 4:9-10 Dan 6:26

Jono Sipsip Morok nkenámp kar

⁶Aerámpan maok, ono nke nanko, Sipsip Morok ankáránk fokopeyak nánko, am te wokwaek faropea napo, sumpwi námp niamp pourouráp. Mao te sia king fek tank nánko, am fek am yiworaopwe ankank yiki yakáp nap, tá arop taokeyakáp konap aropamp sia man ikarea napo, am kuk mek tank. Aenánko, am te souwe fákánek aokránkirámp, tá fákánek yi. Am yi te Kwaromp fákánek spiritono. Kwaro am fákánek spirit te ponankor apár mekmwaek tirá kérép námpono.^s ⁷Am Sipsip Morok te mao akwapea Kwaromp yae-párak mwaek yaekamp buk am sámp. ⁸Mao wae am buk sámpeanánko maok, am ankank yiki yakáp nap, tá 24 arop taokeyakáp konap arop, am fárákap Sipsip Morokamp wonae fik pourou méntér éntér mwaeknámp tukupá pér. Am fárákap ankákáránk námoku gita niamp sámp, tá dis gol ankáránkamp am mek paura nánákáre yankap konap top-pwarámpá yak námpráp sámp. Am te Kwarén koumteouráp aropao kar toropwap i konap wounápono.^t ⁹Tá am fárákap takria maok, tár wourékam arakrá sámp:

“Amo fwap fákánek ke éntu torompiramp buk sámpea,
am kwaráp nanap pwi kar naponono.
Am te apae riteanápe,
wokwaek arop fárákapao
amwan faropea sumpwi pap napo,
waráp yiri fek amo arop fárákapan
yamokwapea Kwarén sánk naponono.
Ye! Amo te ponankor arop fi,
tá ponankor karráp,
ponankor apár mekamp,
tá nkwaekwe make pourouráp ponankor makia,
máte amo warko yamokwap naponono.”^u

¹⁰Amo takia napo,
am fárákap yinomp Kwaromp
pris fákáre yakáp napo,
mao am fárákapamp King yak námpon.
Tá am fárákap te king yakápria,
apárokamp koumteouráp arop fárákapan
poukwap mwanapon.”^v

Sipsip Morokamp e narek sampoknap kar

¹¹Tá ono warko tokoreyakria, kápae kare enselomp kar wawi nampono. Am fárákapan te kouroump mwanap pourou mono, kápae kare

^s 5:6 Sek 4:10 ^t 5:8 Sng 141:2; Yé 8:3-4; 15:2 ^u 5:9 Sng 98:1 ^v 5:10 Ais 61:6; 1 Pi 2:5,9; Yé 20:6; 22:5

fopwakwap-fopwakwapono. Am fárákapao kingomp sia, tá am ankank yiki yakápnap ankank, tá arop taokeyakáp nap aropan kor ikiri yakápria maok,^w 12 am fárákapao tékén arakrá wumwi:

“Mámá te Sipsip Morok wokwaek faropea sumpwi papapono.

Mao te waeman e tokwae,

tá ponankor kwapwe kare ankank,

kwapwe kare yonkwae koukour,

tá kárákáre tokwae kar sámp naenámp te,

waeman pwi kare yak námpono.

Kápaie kare arop maomp e narek sampokria

man warákarrá ‘Aesio’rá sér mwanap te,

waeman pwi kari yak námpon!”

¹³Tá ono kápaie kare nkwaekwe make ankank Kwaro yoroi námp yámar mek yak namp, tá apárok yak námp, tá némp mek yak námp, tá solwara mek yak námp, maomp kar wawi nampono. Ye! Ponankor ankank ponankor mekmwaekamp yakáp nap, ono wa nanko, am fárákapao arakrá sér:

“Am arop te náráp sia king fek tank nánko,

tá Sipsip Morokao kuri am yawor

fwap kápaie kare ‘Aesio’rá sénap kar,

tá e tokwae sánknap,

tá warákár,

tá kárákáre am te waeman

fwap kápaie kare por

sámp saráp yaká yak nenepon.”

¹⁴Tá am yiworaopwe yiki yakápnap ankank támao sérrá, “Am te kare tak mwanapon.” Tá arop taokeyakáp konap fárákapao maomp wonae fik tukupá pérrá man lotu napon.

Sipsip Morokao buk fekamp éntu kwarápnámp kar

6 ¹Tá ono nke nanko, Sipsip Morok mao am buk éntu fek fákáneke ke torompi tari nap ankáránkamp ke kwarokwap. Aenángo, am fek ono wa nanko yiworaopwe ankank yiki yakápnap am ou mekamp ankwap ankáránkampao kar sénánko, maomp kar te oukurérao párákapnámp niampria mao sérrá, “Amo koropae!”^x ²Aerá sénánko ono nke nanko, wupwi kor hos, tá am fek arop tankria píir sámpá tank. Aenángo, yorowar kwe-pwar konap kump man sánk napo, yorowar kwe-pwarará akwapria mao am yorowar kwe-pwarnámp tére oukoumwan térea waerá akwap námpon.

³Tá Sipsip Morok buk fek éntu niamp torompi tenap anánk ke fekamp kwarokwap nánko, am fek ono wa nanko, anánk ankank yiki yak námp

^w 5:11 Dan 7:9-10 ^x 6:1 Yé 5:1

mao sérrá, “Amo koropae!”⁴ Tá am meknámp hos ankwap korop. Am te noumouri kor. Am fek tanknámp aropan kárákáre sánk napo, mao fwap apárokamp koumteouráp aropamp kwapwe kare ke tirá épéri pwar nánko, am fárákap fwap arop ankwap fárákapan tirá wour mwanapon. Aeria man bainat tokwae kar am tére naenámp sánk napon.

⁵Tá Sipsip Morok buk fekamp éntu niamp torompinap yininkan kwarokwap nánko, am ke fek ono wa nanko, yiworaopwe ankank yiki yakáp nap yininkao sérrá, “Amo koropae!” Aeránko, ono hos yákáre kor^y nke nampono. Am fek te arop firamp kápae purump konap skel yaek samp-tank. ⁶Tá ono wa nanko, yiworaopwe ankank yiki yakáp nap meknámp arop kar niamp ankwap arakrá sér, “Amo sospen kánanke mek wit ankárankamp yámar fek térea sámp konámp mani fek purumprá yokwapá papae! Tá amo yininkaopwe sospen kánanke mek bali ankárankamp yámar fek térea sámp konámp mani fek purumprá yokwapá papae. Aeno amo wel ntia wain souroumpouri kwapono.”

⁷Tá Sipsip Morok buk fekamp yiwor éntu kwar-pwar nánko, am ke fek yiworaopwe ankank yiki yakáp nap mekamp yiworao sérrá, “Amo koropae!”⁸ Aeránko ono nke nanko, pourou yar faokor akwapnámp hos ankwap am meknámp korop. Aenáno, am fek arop tank. Maomp e te Sumpwi. Tá arop ankwap maomp e te Yaomwi mek Pik mwanap maomp wakmwaek tank. Am anánkaopwean takenkria kárákáre sánk napo, mao koumteouráp arop ponankor yiwor mwaekamp ankárank mwaekamp kirikiri ponankor tirá wour nenep. Tá am anánkaopwerao tirá wour nenep te bainat fek, tá yae-porokwe tokwae fek, tá nkwakwe make touwe fek, tá apárokamp yao pwae mekamp nape firao, arake fek tirá wour nenep.^z

⁹Tá Sipsip Morok buk fekamp éntik éntu kwar-pwar nánko, ono nke nanko, waemp fákáre alta ankore mek yakáp. Am arop fárákap te wokwaek Kwaromp kar sámpea kárákáreria arop ankwap fárákapan am kar farákápapo, táman yoporap arop fárákapao tirá wouriap aropono.^a

¹⁰Am waemp fákáre tékén arakrá wumwi, “Kárákáre Tokwaeráp Tokwae Kar e! Amo yiki kareno! Waráp ninik te ponankor kare karonol! Apaekamp ke akwapea pwate nánko, amo apárok yakápnap arop fárákapan kotria yinan tirá wouri nap fek am fárákapan nopok érou nanapono?”^b ¹¹Aenapo Kwaro am fárákapan waempyam wupwi tokwaeri moumountukri nénkria mao am fárákapan arakrá sér, “Yumo ankár kánámpár anepér tae morokenke. Nánkár am yopor aropao yumont ankárankamp tére konap yiráp ankwapyaenáp arop fárákapan kor takrá

^y 6:5 ‘Yákáre kor hos’ te nánkár wakmwaek pwar naenámp yae fek nánko, yae-porokwe tokwae korop naenámpan yéknép námpon. ^z 6:8 Ese 14:21 ^a 6:9 Jo 16:2
^b 6:10 Yé 16:5-7

tirá wouranápono. Nánkár am kouroumprá akwapea pwi nánko, Kwaro fwap am fárákapan nopok érou naenámpon.”^c

¹²Tá Sipsip Morok éntu niamp buk fekamp fákup tenap tokwaman kwarokwap nánko, ono nke nánko, némp yérur tokwae koropria apár ponankor oupouroup. Tá yámar te arákarea yam turupwi nokore niamp araknám nánko, yunk te ponankor noumouri koría maok, yiri niampi akwap.^d ¹³Yámar mekamp térme te ponankor apárok mukaria ékrink námpe te yao fik kirao oukoumwan noumouri mo námpan ouwirao nánko, némpouk ponankor ékrink i konám niamp. ¹⁴Yámar me tokwaerao kor kwanpae moukoupá pap konap niamprá akwap te. Tá faonkwe, ént mekamp apár amor ke fárákapaok kor am yakáp i konap pwarará érérekéri tukup. ¹⁵Tá apárokamp king fárákup ntia e tokwaeráp arop fárákup, tá soldia fákáreamp kepten fárákup, tá mani tokwaeráp arop fárákup, tá kárákáre kor arop, tá kápae kare arop kwaporok tére konap, tá kápae kare arop fwap párák yakáp i konap, am fárákup énéni ponankor pirikimpea apár mekmwaek, tá kounk fi mekmwaek wouri yakáp.^e ¹⁶Tá am fárákapaok kápae kare faonkwe tokwae, tá péri wi aran wumwirá, “Yumo ankár yinomp pourouk mapek koropá péria Kwaro sia king fek tankrá nke naenámp fek, tá Sipsip Morokamp yonkwae pwarámp korop naenámp fek yinan oupoupourenke. ¹⁷Am te apae riteanápe, am Yae Tokwae fek te am anánkaopwerao arop fárákup kwatae niniki nap fek nopok touwe kwatae nénk nenep yonkwae pwarámp te wae korop námpon. Aenámpara wa fwap am kwe-pwararea yak naenámpon?”

Kwaromp firáp yakápnap arop fárákapan taok káknám kar

7 ¹Ono am yém niamp nkea pwarará, ankwap yém nke nanko ensel yiworaopwe apár mek yiwor woupwi mwaek foukouri yakáp. Am fárákup te apárokamp yiwor mwaekamp apár mwaekamp ouwipár sámpe-fákeyakáp napo, ouwipár apár mek korop naenámp pourou mo, solwara mwaek kuri korop naenámp pourou mo, yao yowe mek kuri korop naenámp pourou mo. ²Tá ono nke nanko, ankwap ensel yámar aok konám mwaeknám yámar meaok korop. Mao te yiki yak konám Kwaromp taok pap konám sámpea am yiworaopwe ensel Kwaro apár ntia solwara souroumpouri síranáponoria kárákáre sánknám ensel táman kárákáre fek tékén wumwi. ³Aeria mao arakrá sér, “Yumo te apár ntia solwara, tá yao aráte koupour souroumpouri kwapono. Nánkár yino Kwaromp tére aropamp yépe kor fek maomp taok kákea pwar nánko maok, wakmwaek yumo am ankank fwap souroumpour mwanapono.”^f ⁴Tá ono wa nanko, koumteouráp arop fárákapan Kwaromp taok kákrámp kouroump napan ‘Arakae’rá sér, “Mao 144,000 ankákáránk Israel fi mekamp ponankor

^c 6:11 Yé 3:4-5; 7:9,13-14 ^d 6:12 Mt 24:19 ^e 6:15 Ais 2:19 ^f 7:3 Ese 9:4; Yé 9:4

koumteouráp aropan Kwaromp taok káká pwar.”⁵ Aenapo maok, Judamp fekamp 12,000 taok sámp, ta Rubenomp fekamp 12,000, tá Gatomp fekamp 12,000,⁶ tá Aseromp fekamp 12,000, Naptalaimp fekamp 12,000, tá Manasamp fekamp 12,000,⁷ tá Simionomp fekamp 12,000, tá Livaimp fekamp 12,000, tá Isakaromp fekamp 12,000,⁸ Sebulunomp fekamp 12,000, tá Josepomp fekamp 12,000, tá Bensaminomp fekamp 12,000. Mámá arop fákáre mao Kwaromp taok sámp napon.

Kápaie kare arop ou tokwae Kwarén lotunap kar

⁹Ono am ankank ponankor nkea pwarará, ono warko tokoreyakria nke nanko, kápaie kare koumteouráp arop fárákap koupoukour yakáp napo, am arop fárákap te kouroumpea pwi mwanap pourou mono. Am koumteouráp arop fárákap te nkwaekwe make pourou yipiráp, tá kápaie kare arop fi ponankor, tá ponankor apár mekamp, tá ponankor moumountukri karráp, am fárákap sia king wonae fik, tá Sipsip Morok nke námp fek foukouri yakáp. Am fárákap te wupwi kor waempyam tokwaeri yiriria, tá oupuk pwae yaek tia,⁸ ¹⁰arakrá tékén wumwi, “Nomp Kwar sia king fek tank námp, tá Sipsip Morok am yaworao nomwan warko éréképea nepo, nomo oukoumwan yae-párak yakáp námpono.”

¹¹Tá ensel fákáre ponankor, tá arop taokeyakápnap arop fákáre ntia yiworaopwe ankank yiki yakáp nap, am fárákap sia king ikarea yakáp. Tá am fárákap sia king wonae fik pourou méntér éntér mwaeknámp tukupá pérria Kwarén lotu. ¹²Aeria arakrá sér,

“Kare karono,
nomo nomp Kwarén warákára wae mwaro.
Aeria nomo maomp e tokwae érik sér mwaro.
Mao te ponankor kwapwe kare ninikrápara,
nomo man fáparakrá maomp e narek sampok mwaro.
Mao te kárakáre karenó.
Ye! Ponankor kárakáre tokwae te
maomp pourouk yak námpono.
Mámá ponankor ankank te maomp sarápono.
Kare karono.”

Am fárákapao touwe sámpnap ke wae pwarnámp kar

¹³Tá taokeyak konámp arop ankwapao onan sérrá, “Mámá wupwi kor waempyam tokwaeri yirirnap arop fárákap máte wanon? Tá am fárákap te maoknámp korop napon?”^h

¹⁴Tá ono nopok man sérrá, “Tokwae Kar e! Amoku támao amo mér napon.” Tá mao onan sérrá, “Mámá arop fárákap te wokwaek touwe

tokwae yopor aropao nénkapo, tia yakápiap arop fárákaponono. Am fárákapamp waempyam te Sipsip Morokamp yiri fek yáraría napo, maomp waempyam wupwi kwapwe námpono.ⁱ ¹⁵Aenapara, am fárákap Kwaromp sia king wonae fik foukouri yakáp napon. Tá yámarao, tá kumuruk kuri maomp Yiki Kor Nap mek maomp tére tére konaponono. Tá Kwar am sia king fek tank konámp, mao námoku am fárákapént yakria taokeyak naenámpono.^j ¹⁶Aenánko am fárákap te mwae touwe mo, éntantá nikip mo mwanaponono. Am fárákapan yámar touwe fokor mo, tá ankwap ankank man pourou touwe fokor mo naenámpon. ¹⁷Am te apae riteanápe, Sipsip Morok sia king amore mek yakria am fárákapan sipsip taokeyak konámp aropnámp taokeyak námpono. Mao te fwap am fárákap éréképea ént oukurnámp fik akwap nánko, am fárákap yiki yak sánk konámp ént fár mwanaponono. Tá am fárákapamp yi mekamp émti Kwaro torokor nánko, am fárákap warko éménk mono.”^k

Sipsip Morokao buk fekamp fákánekan éntu kwar-pwarnámp kar

8 ¹Tá Sipsip Morok buk fekamp fákánekan tompnámp éntu kwar-pwar nánko, am ke fek te pourouk kánanke yak mo, tá yámar mek kar sérar mo, akwapea hap aua fek. ²Aenánko, wakmwae ono nke nanko, ensel fákánekan Kwaromp wonae fik foukouri yakáprá fákánekan wur tia fákeyakáp. ³Tá ensel ankwap koropea alta wonae fik fokopeyak. Mao te gol fekamp dis am mek paura nánákáre souri pokanoria yankap konap yaek sámp-fákeyak. Aenánko man kápae kare paura nánákáre nénk. Am enselo am tia, kápae kare Kwaromp firáp aropamp kar toropwap i konap koupoukarea mént tapokwapea Kwarén ofa i konap golráp alta fek paprá Kwarén sánk. Am alta te Kwaromp sia king wonae fik yak námpon. ⁴Tá am yaomwi souri paura nánákáre yankap nap, ntia Kwaromp koumteouráp aropamp Kwarén kar toropwap i konap, am ponankor enselomp yaek pwarará narek poka Kwaromp nás mek.^l ⁵Aenánko ensel paura nánákáre yankap konap dis am sámpea alta fekamp yaomwi am dis mek top-pwarámpea am yaomwi sámprá apárok sir. Mao apárok sirrárá pwaránko oukurér tokwae párákapria pourouk tokwae nánko, mékér wae fápárákár akwap nánko, apár némp yérur tokwae.

Ensel yiworaopwerao wur fukurnap kar

⁶Tá am fákánekan ensel fákánekan wur kor tia yakáprá wae wur foukour mwaria nánap. ⁷Tá ensel ankárankamp mao náráp wur fokop nánko maok, warákam ais, tá yaomwi ntia yirirént tapokwapea apárok kwarokor pik. Aenánko, ponankor apár yinink mwae kamp ankwap ankárank mwae kirikiri mwae kamp apár, tá am mwae kamp yao

ⁱ 7:14 Mt 24:21 ^j 7:15 Ais 49:10 ^k 7:17 Sng 23:2; Ais 25:8; Yé 21:4 ^l 8:3-4 Yé 5:8

ponankor, tá yiki kor apwar pwaeran kor ponankor yaomwirao fári pwar.^m

⁸Tá ensel anánkao náráp wur fokop nánko, faonkwe tokwae fek yaomwi yurunknám niamp sinapo, solwara mek piká párákap. Am solwara te yinink mwaek fékerrá oumwi kákea pwate napo, ankwap ankárankamp mwaek te yiri arákarrá yak. ⁹Aenánko am solwara mek yiki yakápnám ankank yinink mwaek pir-pwara nap am te ankárankamp mwaek fi te ponankor surumpwi pwar. Tá sip yinink mwaek pirékarea pwaranap, ankárank mwaek ponankor tokopá akwap.ⁿ

¹⁰Tá ensel yininkao náráp wur fokop nánko maok, térme tokwae ankárankamp yaomwi kare saromnám yurunkia am yámar mek pwararea apárok piká párákap. Ént yinink mwaek pir-pwarará oumwi kák tenap am térme ankárankamp mwaek ént oukurnám mek, tá ént kar mek piká párákap. ¹¹Am térmeamp e te Top i konám Marasin. Am ént yinink mwaek pirékarea pwatanap ankárankamp mwaek te, am ént wae top kwatae kare. Aenánko kápae kare arop am ént fánapo, am fárákapamp yare mek topa wae nánko, am fek surumpwi naponono.

¹²Tá ensel yiworao náráp wur fokop nánko, yámar ntia yunk, tá térme ponankor yinink mwaekamp ankárank mwaek ponankor souroumpouri yakáp napo, wae yokor konap am táman kor yinink mwaek pirékarea napo, ankárank mwaek kirikiri wae yokor konám akwapea kirikip. Aenánko, yámar ntia kumur ankárankamp mwaek kirikiri te wae yokor mono.

¹³Tá ono nke nanko, tu tokwae ankárankamp yámar mek amorik furukarea akwap. Ta ono wa nanko, mao tékén arakrá wumwi, “Koupoutáráp nap, koupoutáráp nap, koupoutáráp nape, apárokamp kourteouráp arop koupoutáráp nape! Am te apae riteanápe, ankwap yininkaopwe ensel mao náráp wur fokour mwarea nap te, touwe tokwae kourteouráp arop fárákapan korop naenámpon.”^o

Ensel éntirao wur fokopnám kar

9 ¹Ensel éntirao náráp wur fokop nánko maok, ono nke nanko, térme ankárankamp yámar mek pwarará, apárok piká párákap. Aenánko, Kwaro man am apár me tokwaeri fi tikipnám yak monám ménki kikip naenámp ki sánk. ²Am térmeao am me kik-pwaránko, am me meknám yaomwi tokwae yanknap souri niamp aok. Aeria am souri te yámar ntia ouwipáran oupouroup nánko, yámar ntia ouwipár akwapea kirikip. ³Aenánko, kápae kare tákár oumpwe niamp am yaomwi souri meknám apárok pikrink. Tá am fárákapao sámpnap kárákáre te kaoamp touwe sánk konám kárákáre niampria, am te arop yamp nánko touwe tokwae

^m 8:7 Kis 9:23; Jol 2:30 ⁿ 8:9 Kis 7:20-21 ^o 8:13 Yé 9:12; 11:14

naenámp ankankono.^p 4Tá am fárákapan kar arakrá sér, “Yumo te apwar pwae, tá apárokamp nkwakwe make ankank némpouk forokor konámp, tá yao ankwap aráte kwatae pap kwapono, mono. Yumo ankár am arop fárákap Kwaro náráponoria yépe kor fek taok paprá kumwi námp yak monámp aropan sámpá kwatae pap kipo.”^q 5Yumo am arop fárákapan touwe sánk nap te akwapea éntik yunk napao maok, am arop fárákapan te tirá wouri kwapono.” Tá am arop touwe kwatae nénknámp kao niamp am támao arop yourounkwe nánko, touwe tokwae naenámp.^r 6Am taknámp ke fek arop wae sumpwi mwaria mwae kup oupourouk napao maok, am sumpwi mwanap mwae kup te nke mono. Ye, arop sumpwi mwar kar napao maok, sumpwi te am fárákapan sámp mono.

7Ono nke nanko, am tákár fákáre te hos fákárerao yorowarrá tukup mwaria nánap nap niampono. Am ankank fárákamp me korok te gol fekamp kump niamp woukouri yakáp. Tá am fárákamp yimetáp te arop yimetáp niamp. 8Tá am fárákamp me pwae te koumteouramp me pwae éréri niamp pourouráp. Tá am fárákamp yu kor te laionomp yu kor niamp. 9Am fárákamp éntér kor fek te kapa fekamp kárae yiriria yakáp. Tá maomp yowe pwae énk te yorowar mek tukup mwanap kápae kare hosráp karisamp ounk niampono. 10Am fárákamp kore te kao kore kor niampria, aropan touwe sámp naenámp marasin am meknámp sánk konámp kore kor wiráp yak námpon. Tá am fárákamp kore kor te arop touwe sánkrá akwapea éntik yunk fek naenámp kárákáre samp naponno. 11Am fárákap te waeman taokeyak naenámp king yak námpon. Am king te apár me éri fi tikipnámp yak mo, ankár piknámpamp enselono. Am ensel te Hibru kar fek maomp e ‘Abadon’ ri konaponno. Tá nomp Grik kar fekamp e fi te ‘Kápae kare ankank kwataerá kák naenámp aroponno’.

12Má manénkir koropnámp touwe tokwae kwatae te wae pwar námpon. Wakmwaek korop naenámp touwe tokwae oukoumwan anánkaopwe yak námpon.^r

Ensel tokwamao wur fokopnámp kar

13Tá ensel tokwamao náráp wur fokop nánko, ono wa nanko, Kwaromp wonae fik yaknámp alta gol fek yiawor woupwi meknámp kar sér.

14Mao am wur fákeyaknámp ensel tokwaman arakrá sér, “Am ensel yiaworaopwe ént Yufretis mwaek fákápá yakáp nap amwar pwar napo tukupanáponno.” 15Aeránko maok, mao wae am yiaworaopwe ensel pwar nánko, wae am fárákapao ponankor koumteouráp arop yinink mwaekamp pirékara nap ankárank mwaek kirikiri ponankor paoki pwar naenámp. Am ensel fárákap te am tére mwanámpria am ke korop naenámp am yae, tá am yunk, tá am korop naenámp yopwar táman yépékrá nánapi yakáp

napon.^s 16 Tá soldia fákáre hos fek tankáp nap te 200 milion. Ono am kouroumpea sénapo, wawi nampono. 17 Tá ono yém niamp arakria hos fákáre am fek arop tankáp nap nke. Am arop fárakapao yiririna kárae fek yaknámp te noumouri kor, tá muru kor, tá yar kor. Am hosamp me kor te laionomp me kor niamp arake, tá yaomwi yurunk ntia souri, tá yumwi salfa fekamp yaomwi maomp táp meknámp koroprá fápákár akwap.

18 Am fárakapao koumteouráp arop ponankor yinink mwaek pirékarea pwar napan ankárank mwaek te mámá yininkaopwe ankank kwatae fek paoki pwar napon. Am mámá yaomwi, tá souri, tá salfa yumwi fek yaomwi yurunk námp, hosamp táp meknámp korop námp, am fek paoki pwar napon. 19 Am hos fákáreamp touwe sánk naenámp kárakáre te táp mek yak, tá maomp kore kor fek yak námpon. Maomp kore kor te tákam niamp me korrápao am me kor fek táman aropan touwe sánk konámpon.

20 Arop ankwapmwaek ponankor oukoumwan am yaomwi ntia souri ntia yumwi salfa fekamp yaomwi fek sumpwi mo nap te, kwatae ninik younkwek sir mono. Am námokuráp yae fek yoroia man lotu mwanap ankankan pwar mono. Tá kare! Am fárakap te kwatae spirit fárakapan, tá kwekár kwar mao námoku gol, silva, tá bras, tá yumwi, tá yao am fek yoroinap ankank nke naenámp pourou mo, kar wa mo, yárok mo, mak i konámp táman lotu napono.^t

21 Am arop fárakap arop ankwap fárakap tirá wourrá, foupourá, kokoporrá, oukunrá, mak i konapan maok, am pwarará kwatae ninikan kor younkwe mwaek sir mo napon.

Jono enselo buk sánk nánko fárinámp kar

10 1 Ono am ankank nkea pwarará, ono warko nke nanko, ensel kárakáre kor ankwap yámar meknámp ék. Maomp pourouk te koumwerao oupouroupá yak nánko, fou yimpnámp yépe kor fek kámpá yak. Maomp yimetáp te yámar wae niamp, tá maomp pu kor te oumpwar fokopeyak nánko, ponankor yaomwi yurunk aowarámp námp niamp. 2 Mao buk kánanke ankárankamp yaek fákeyak nánko, am buk fupukurae yak. Mao te yae-párák mwaek pu solwara yumuntuk pumpur, tá yae-mánkwan mwaek pu apár kar fek pumpuri yak námpono. 3 Maomp wumwi kar kárakáre te laionomp kar tokwae niampono. Mao arakrá wumwi nánko, fákánek oukurér párákaprá nopok kar sérar. 4 Am fákánek párákapnámp oukurér kar sérar napo, ono koupour am kumwi naeria nampan maok, ono wa nanko, yámar meknámp kar ankwap onan sérrá, “Am fákánek párákapnámp oukuréramp kar am te amo ankár waráp ninik mek fákapea papae. Amo kumwi kwapono.”

5 Tá am ensel ono wokwae nke nanko, solwara yumuntuk, tá apár kar fek fokopeyak námp, mao yámar mek náráp yae-párák mwaek

^s 9:15 Yé 8:7-12 ^t 9:20 Sng 135:15-17; Yé 16:9,11

yae ka-sampok. ⁶ Aeria mao narek yiki yaká yak konámp Kwaromp e fek fou e sér. Am Kwar te yámar me ntia am mek yakápnámp ankank ponankor, tá apár ntia am mek yakápnámp ankank, tá solwara ntia am mek yakápnámp ankank ponankor yororoimp Kwarono. Am enselo arakrá sér, “Pwar naenámp ke wae korop námpono. Kwar te warko yépék naenámp pourou mono. ⁷Warko wakmwaek ensel fákánerao wur fokop nánko, am wur kar korop nánko, am ke fek am ankank Kwaro nanampria wokwaek sérimp kar te mek yakámpan mao wae tére nánko, érik korop naenámp. Am kar mao náráp tére konap profet fákárean wokwaek kar sérimp támaono.”

⁸Tá am aropamp kar manénkir wawi namp, warko yámar meknámp koropria onan arakrá sér: “Amo akwapea ankwapmwaek pu solwara mek, tá ankwapmwaek pu apár kar fekia fokopeyáknámp enselomp yaek fupukurae yaknámp buk sámpae.” ⁹Aeránko, ono akwapea enselonámpokria ono man sérrá, “Amo onan támá buk kánanke sápaé.” Tá mao onan sérrá, “Amo sámpea fárae. Am te fária napo, waráp yare mek te yorowar naenámpan maok, waráp táp mek te hani nape kwapwe niamp naenámp.” ¹⁰Mao takrá séri pwar nánko, ono am buk kánanke enselomp yaekamp sámpea, ono fár. Tá onomp táp mek hani nape kwapwe niamp námpao maok, ono fári pwate nanko, onomp yare mek te yorowara wae. ¹¹Tá Kwaro onan sérrá, “Amo kápaé kare apár mekamp arop firan, tá kápaé kare pourou yípiráp aropan, tá kápaé kare karráp aropan, tá kápaé kare king fákáreran korop naenámp ankank má profet kar warko farákápaé.”

Arop anánkaopwerao kar farákáp nep kar

11 ¹Ono am fek purump konap yaopwae mear yaopwae niamp sáприя onan sérrá, “Amo fárámprá Kwaromp Yiki Kor Nap ntia alta purumpae! Tá amo am mek lotu i konap koumteouráp arop kouroumpae! ²Aeno amo yár Yiki Kor Nap pu-pwaek yak námp te purump kwapono. Amo ankár pwarampo. Am yár te ankwap fi aropampono. Nánkár am fárákapao koropea am Yiki Kor Némppumpuri yakáprá tukupea 42 yunk fek mwanapono.” ³Aenapo, ono mámá arop anánkaopwe sámp-kérép nanko, onomp kar farákáp nenepono. Am arop yawor te yonkwae touweria yirímp konap waempyam yirimpea onomp kar farákáprá akwapea 1,260 yae^f fek nenepon. ⁴Am anánkaopwe te yao oliv^w yawor niamp, tá lam anánkaopwe apár ponankoramp Tokwae Karamp wonae fik yak nepon.^x ⁵Táte arop ankwap fárákap am arop yaworan sámpá yampourou mwaria napo te, am arop yaworamp táp meknámp yaomwi koropria am arop yaworan yopornap

^u 11:2 Lu 21:24; Yé 13:5 ^v 11:3 1,260 yae te 42 yunk, tá yinink yopwaria yiawor amore mekan sénámp. ^w 11:4 ‘Yao oliv’ te kantri Israel firan wounáp námpon.

^x 11:4 Sek 4:11,14

arop fárákapan wouroukoumpi pwar naenámp. ⁶ Am arop yawor Kwaromp kar fárákáp nenep ke fek te, waeman yámar mek warákam ékantá kér nenep kárákáre yak námpon. Tá am arop yawor te ént ponankor yiri arákarrá kák nepo, am támao apárokamp koumteouráp aropan nkwakwe make kwatae ankank fek kwatae pap nenepon. Kápaé kare ke fek am arop yawor tak neria te, fwap tak nenep kárákáre yak námpon.

⁷ Am arop yawor Kwaromp kar fárákápnep tére wae pwar nepo, yao pwae mekamp fir am fi tikip monámp apár me éri meknámp narek aokea am arop yaworént yorowar. Yorowaria am arop yaworan kwe-pwararea faoporia kák nánko, sumpwi nenepon.⁷ ⁸ Aetenánko, am arop yaworam yákáre te taun tokwae kar mek akwapnámp mwae kupuk tank nenepon. Am ‘Taun’rá sénap te mek wounáprá ‘Sodom’ tá ‘Isip’rá sénapon. Am taun tokwae mek táman wokwaek am arop yaworam Tokwae Karan yaopwae porokopramp fek faropá papapono. ⁹ Arop ankwap fárákáp ponankor apár mekamp, tá ponankor arop fi, tá ponankor karráp, tá nkwakwe make pourou yipiráp ponankor, makia am arop yaworan, fwaprá kar sumpwi neponoria am yákáre nkerá tukupea yinink yae akwapea yiawor yámar kuk námp fek mwanapon. Tá arop fárákáp am arop yaworam yákáre ‘Apár me mek pap kwapono’rá sér mwanapono. ¹⁰ Tá apárokamp koumteouráp arop am arop yawor sumpwi nep táman warákáránkrá tár sámprá fir fépérrá nouroup arop fárákapan ankank nénk. Am te apae riteanápe, am profet yawor apárok yakápnep koumteouráp aropan ponankor touwe nénk konepantá mwanapon.

¹¹ Yinink kumuria yiawor yámar kuknámp yae fek táman Kwaro yiki yak naenámp néké am arop yaworam yákáre mek sámp-kérép nánko, am arop yawor fárámpea fokopeyak. Aenepo, arop fárákáp am arop yaworan nkea apáp tirinka wae. ¹² Tá am arop yaworao wa nepo, kar ankwap yámar meknámp tékén am arop yaworan arakrá wumwi, “Yumo narek mapek aokenke!” Aeránko maok, am arop yawor koumwe mekia yámar mek pok nepo, am arop yaworan yopornap arop fárákáp mao pok nep wae nke.^z ¹³ Tá am ke fek táman némp yérur tokwae korop nánko, am taun ankárank mwae kirikiri kwatae akwap nánko, sarakok mwae oukoumwan fwap yak. Tá 7,000 koumteouráp arop am némp yérur fek tapek ponankor surumpwi. Tá ankwap koumteouráp arop fárákáp fwap yakáp nap apáp tirinka waeria, yámar mekamp Kwaromp e sámpá sakap.

¹⁴ Anánkaopwe touwe tokwae kwatae korop námp wae pwarane. Aeno koupoutáráp nap, wawenk! Yininkan korop naenámp touwe tokwae te wae wonae fik kar námpon.^a

Ensel fákánerao wur fokopnámp kar

¹⁵ Tá ensel fákánerao náráp wur fokop nánko, ono wa nanko, yámar meknámp kar ankwap tékén arakrá wumwi: “Nomp Tokwae Kar ntia

y 11:7 Yé 13:1 z 11:12 2 Kin 2:11 a 11:14 Yé 9:12

maomp Krai am anánkaopwe te apár-apár ponankoramp Kingono. Tá mao ankár King yaká yak naerámpon.^b ¹⁶Tá am 24 arop taokeyakáp i konap arop Kwaro nke námp fek sia fek tankáp i konap, am fárakap Kwaromp wonae fik apárok tukupá pérrá Kwarén lotu.^c ¹⁷Am fárakapao sérrá,

“Tokwae Kar, amo Ponankor Kárakáreráp Kwarono!

Amo oukoumwan yak nap,

wokwae kar amo yakap,

amo wae waráp kárakáre tokwae sámpea,

amo King yak naponono.

Aenapantá yino amwan ‘Aesio’rá séreano.

¹⁸ Ankwap fi arop, waráp kar wa te monoria

yonkwae pwarámp napan maok,

nopok waráp yonkwae pwarámp te wokwae korop námpon.

Oukoumwan má ke fek te,

sumpwinap arop kot mwanaponono.

Oukoumwan má ke fek te,

nopok kwapwe kare ankank

waráp tére aropan nénk nanap keno.

Am te profet fákáre,

tá waráp koumteouráp arop fárakap ponankor

amwan apápria,

waráp yae ankore mek yakáp i konap,

eráp arop fárakap,

e moráp arop fárakapan kor

ponankor mént nopok nénk nanaponono.

Oukoumwan te apár kwatae pap

konap arop fárakapan

kwatae pap nanap kenono.”^d

¹⁹Am taokeyakáp konap arop fárakap takrá séri pwar napo, yámar mek yaknámp Kwaromp Yiki Kor Nap ménki kik-pwar napo, Kwaromp kontrak tanknámp bokis am Yiki Kor Nap mek tank konámp érik tank. Aenánko, mékér wae fápárakár akwap nánko, pourounkria oukurér párakap nánko, apár némp yururria kápae kare aisráp warákam ék námpon.

Yupu ntia wunépir wounápnámp kar

12 ¹Tá yámar mek wunéri tokwae ankwap korop námp te arake: Yupu^e ankárankamp yakria, yámar te mao náráp pourouk

^b 11:15 Dan 7:13-14; 1 Ko 15:24-25; Yé 19:6 ^c 11:16 Yé 4:4,9-10 ^d 11:17-18 2 Ko 5:10; Yé 1:8; 20:11-13 ^e 12:1 ‘Yupu’rá sénámp te, Israel firan sénámpon.

waempyamnámp yirimp. Tá yunk maomp pu ankore mek yak. Tá kump mek éntér-sámpramp térme yak námp maomp me korok woukwap. ²Mao te táráp^f yakria, táráp fárákap naenámp touwe tokwae sámpria tékén apánka wae. ³Aenángo, ankwap wunéri yámar mek korop. Am wunéri te ará: Wunépir niamp ankwap yak. Am te noumouri korao maok, fákánek me kor, tá fére-sámpramp souwe aokránkirámp, tá kump fákánek kingao woukour i konámp niamp am fákánek me korok yakáp. ⁴Maomp kore kor fek ankárank mwaek kirikiri térme yámar mekamp yaokwampia apárok épér. Aenángo, anánk mwaek kirikirikamp térme mwar yámar mek yak. Tá am wunépir yupu-táráp sámp naerianámp, maomp wonae fik yakria am yupu-táráp sámpeanángo, man am táráp sámp-nonkorop nanampria yépékrá yak. ⁵Tá yupu poumou-táráp sámp. Am táráp te nánkár téképá yakria wakmwaek koumteouráp arop fárákap ponankor kárákáre fek poukeyak naenámp ain yaopwae sámp naenámp. Am yupu wae táráp sámpeanángo, koupour kar am táráp sámpea narek pokea Kwaronámpok maomp sia king fek sámpá tukup. ⁶Aenapo, tá am yupu farákapea kwar saráp mek akwap. Ampok te wae Kwaro maompor némp nánapi pwate nánko, man ampok taokeyakápria man fir nénkrá tukupea 1,260 yae fek mwanapon.

⁷Oukoumwan te yámar mek yorowar tokwae korop nánko, Maikel ntia maomp ensel fákáre wunépirént yorowar. Tá am wunépir ntia maomp ensel fákáre nopok kor yorowaria maok,^g ⁸mao te yorowar kwe-pwar mwanap kárákáre te yak mono. Aenapara, am fárákap te warko yámar mek yakáp mwanap pourou mono. ⁹Tá Kwaromp ensel fákáre am wunépir apárok far-sinapon. Mao te am wokwae kar yakámp tákam Satan, ponankor aropan kot i konámp arop, tá ponankor koumteouráp aropan poupwékáp i konámp aropono. Man apárok far-sirarrá maomp ensel fákáreran kor méntér fárarámprá épér napon.^h

¹⁰Tá ono wa nanko, yámar meknámp tékén arakrá wumwi: “Oukoumwan te nomp Kwaro nomwan wae warko érékép námpono. Maomp kárákáre wae érik korop nánko, mao King yak námpono. Tá maomp Kraiss wae kárákáre tokwae sámp námpono. Am te apae riteanápe, am nomp ankwapyaenáp fákáreran kot i konámp arop nomp Kwaro nke námp fek wae fek, tá kumuruk, am fárákapan kot i konámp maok, oukoumwan te wae ensel fákárerao apárok far-sinapono.ⁱ ¹¹Nomp ankwapyaenáp fákáre wae Sipsip Morokamp yiri fek kárákáre sámpea, maomp kar kare farákápria amnap ninik fek yopor aropan yorowar kwe-pwararea yérépea pwar napono. Am fárákap te apárok kwapwe kare

^f 12:2 ‘Táráp’rá sénámp te, Jisaso Israel fi mek ékianámpan warko yámar mek pokea Kwaromp sia king fek tank námpan sénámp. ^g 12:7 Érik 9 ^h 12:9 Stt 3:1; Yé 20:2-3 ⁱ 12:10 Jop 1:9-11; Sek 3:1

yakáp mwaria ninik mono. Numwar yoppor aropao tirá wouranáponoria yéknépá yakápi naponono. ¹²Aenapara, yámar me amo, tá yumo ponankor yámar mek yakáp nap, yumo te warákár kipo! Aeno amo apár, tá amo solwara yumo mér kipo! Yumwan touwe tokwae kwatae korop naeane. Satan te wae yumonapok pik tenámpono. Mao te náráp ke wae fae tákáre nánko, táman mér nám p kwamp, yonkwae pwarámp tokwae námpon.”

¹³Am wunépir te nke nánko, námwan apárok far-sinapantá, akwapá am poumou-táráp sámpnám yupu táman yérepe. ¹⁴Tak nám pantá maok, am yupu furukarea náráp némpouk kwar saráp mek farákap akwapea am wunépir panek yak nánko, fwap yakanoria, tu tokwaeramp yowe pwae yawor nénk. Tá am ampok man taokeyakáprá fir nénkrá tukupea, yinink yopwaria yawor táman amore mek. ¹⁵Tá am wunépir táp meknám ént ayam nánko, am ént tokwae am yupuamp wakmwae kwarákarrá akwap. Am wunépiramp ninik te éntao akwapea am yupu sámp nánko, yupu sumpwianoria. ¹⁶Aenámpan maok, kwarao am yupuan yaewouria kwar mek tákár pik nánko, ént am mek piká pwar. ¹⁷Tá am wunépir te am yupuan yonkwae pwarámpea yárákia maomp ankwap tárápuan^j yorowar naeria. Am koumteouráp arop farákap te Kwaromp ponankor loak tukupria Jisaso farákápnám kar kárákáre fek sámp-fákeyakápnap arop farákaponono.^k ¹⁸Tá am wunépir te solwara woupwi mek fokopeyak námpan.

Yao pwae mekamp fir anánkaopwe koropnep kar

13 ¹Tá ono nke nanko, yao pwae mekamp fir solwara^l meknám korop. Mao te souwe fére-sámpramp, tá fákánek me korráp. Am souwi fek fére-sámpramp kump kingao woukwap konám am fek woukouri yak. Tá maomp me kor fek te e ankwap yakáp. Am e fi te ‘Kwarén nkwakwe make wouroump séri konap’ enono.^m ²Am yao pwae mekamp fir oukoumwan ono nke nanko te, lepat niamp, tá maomp pu kor te beamp pu kor niamp. Tá maomp top kor te laionomp top kor niamp. Tá am wunépirao náráp kárákáre am yao pwae mekamp firan sánk námpono. Man mao námoku niamp king yakanoria papria, man kárákáre tokwae sánk námpon. ³Am yao pwae mekamp firamp me kor ankwap te wae yankopea sumpwi pap nap niamp pourouráp. Aenámpao maok, maomp me kor fekamp ankáráp te wae aoporea warko fwap námpon. Tá arop ponankor am yao pwae mekamp firan kokorokoria maomp wakmwae tukup napon. ⁴Am wunépirao náráp kárákáre yao pwae mekamp firan sánk námpara, arop ponankor am méria wunépiran lotu

^j 12:17 ‘Tárápu’rá sénám te Jisasomp wakmwae tukupnap arop farákapan sénámpon.

^k 12:17 1 Pi 5:8 ^l 13:1 ‘Solwara’rá sénám te, arop fi ponankoran wounáp námpon.

^m 13:1 Yé 17:3,7,12

napon. Tá am yao pwae mekamp firan kor loturia arakrá sér, “Wa mámá yao pwae mekamp fir niamp make pourouráp yak námpon? Wa fwap méntér yorowar naenámp pwi námpon?”

⁵Tá Kwaro am yao pwae mekamp firao numwar takanoria pwate nánko, mao kara waerá Kwarén wouroump kar sénámpon. Tá mao wae take pourouráp térerá akwapea 42 yunk fek naenámp. ⁶Mao náráp top kor kununkarrá Kwarén wouroump-séria, Kwaromp e fek, tá Kwaromp némpouk, tá Kwaromp firáp yámar mek yakáp nap man kor wouroump-sénámpon. ⁷Kwaro ‘Mao numwar takano’ ria pwate nánko, mao Kwaromp koumteouráp aropént yorowaria kwe-pwararea am fárákapan apárok tirá nér námpon. Tá mao fwap kárákáre sámpea ponankor arop fi, ponankor apár mekamp, tá ponankor karráp, tá ponankor pourou yipiráp arop makia ponankor aropan poukwap naenámp.ⁿ ⁸Apárokamp ponankor koumteouráp arop, am fárákapamp e yiki yak sámp mwanap aropamp eráp buk fek wokwaek Kwaro apár yoro mo námp fek kumwi moimp, am fárákap yao pwae mekamp firan lotu napon. Am buk te wokwaek sámp-wouroumpap Sipsip Morokamp bukono.^o

⁹“Arop te waeman woupwirápara, mao ankár mámá kar fwapi wa kuno. ¹⁰Táte Kwaro ankwapan fákapá yakanorianánko te, ankár akwapea fákapá yak naenámp. Táte Kwaro arop ankwap bainat fek sumpwianorianánko te, mao ankár bainat fek sumpwi naenámp. Táte am take pourouráp ankank korop nánko te, Kwaromp koumteouráp arop ankár kárákáre fek Kwarén mér nap sámp-fákeyakáp kip.”^p

¹¹Tá ono nke nanko, yao pwae mekamp fir ankwap, kwar meknámp narek aok. Mao te sipsip morokamp souwe anánkaopwe niamp pourouráp, tá maomp kar te wunépiramp kar niamp pourouráp. ¹²Am wakmwaekamp yao pwae mekamp fir te manénkirkamp yao pwae mekamp firamp kárákáre sámpea, am kárákáre fek manénkirkamp yao pwae mekamp firao nke námp fek tére námpon. Mao te koumteouráp aropan kárákáre fek poukeyakrá fopwaoka wae nánko, apár ntia koumteouráp arop fárákap am mek yakáp nap, am manénkirkamp yao pwae mekamp firan lotu napon. Man te wokwaek sumpwi pap mwaria porokwapnap ankáráp kwatae wae aopore tenámpon. ¹³Wakmwaekamp yao pwae mekamp fir te nkwakwe make kárákáre yéknép námpon. Ankwap pourouráp kárákáre te ará: Koumteouráp aropao nke nap fek mao nánko, yaomwi yámar meknámp apárok éká párákap. ¹⁴Kwar te numwar manénkirkamp yao pwae mekamp fir nke námp fek, nkwakwe make kárákáre yénkria amnámp ankank támao némpoukamp koumteouráp aropan yankar sérarano ritea yépékrá yak. Mao koumteouráp aropan arakrá sér, “Yumo ankár yao pwae mekamp

ⁿ 13:7 Yé 11:7 ^o 13:8 Yé 3:5 ^p 13:10 Yé 14:12

firamp wunéri yorororá maomp e narek kakap mwanapono.” Am yao pwae mekamp fir wokwaek bainat fek porokwapá pap napan maok, mao oukoumwan yiki yak námpon.^q ¹⁵Tá Kwaro numwar takanorianánko, mao am wunérian yiki yak naenámp nékér sánk nánko, am wunéri kar sér. Táte arop ankwap fárákap man lotu mo napo te, mao sénánko, tirá wour mwanapono. ¹⁶Tá wakmwaekamp yao pwae mekamp firao sérrá, “Wuri nke mwanap ankank yae-párák mwaek yae, tá ponankor aropamp yépe kor fek taok paprá kukumwirá párapokpria, e kánankeráp arop fárákap, ntia e tokwaeráp yakápnap arop fárákap ntia mani tokwaeráp arop ntia ankank moráp arop fárákap, tá párák yakápnap arop fárákap ntia slev térenap arop fárákap man kor kukumwirá párapok kipo.” ¹⁷Aenámpara, táte yao pwae mekamp firamp e, tá maomp e fi kouroump námp am aropamp pourouk yak mo nánko te, mao arop ankwapan ankank mani fek sámp mo, tá arop fárákapao maonámp ankank mani fek sámp mono.^r ¹⁸Nomo ankár táman fwapi ninik mwaro. Arop wae mér námp kwamp te, yao pwae mekamp firamp e fi kouroumpea kumwi tenámp fwapia mér kuno. Am kouroump námp te arop ankwapamp enono. Am aropamp eramp fi ponankor tapokwap námp te 666.

144,000 arop fárákap tár wourékam sámpnap kar

14 ¹Ono warko nke nanko, Sipsis Morok Saion faonkwek fokopeyak nánko, 144,000 koumteouráp arop fárákap méntér fokouri yakáp. Aenapo, am fárákapamp yépe kor fek Kwaro Sipsis Morokamp e, tá maomp Naropwaromp e makia kukumwia pwatanámp yakáp.^s ²Tá ono wa nanko, yámar meknámp ounk korop nánko, am te ént souroukoup tokwaenámp niamp, tá oukuréao párákap námp niamp. Am ounk te aropao gita porokwapnap ounk niamp.^t ³Am fárákapao Kwaromp sia king wonae fik, tá yiworaopwe ankank yiki yakáp nap, tá arop taokeyakáp konap fárákapao nke nap fek tár wourékam ankwap sámp. Am 144,000 koumteouráp arop te wae Kwaro apárokamp koumteouráp arop ou mekamp warko yamokwap námp, am fárákap támao saráp am tár kar fwap mér mwanapono. Tá arop ankwap am tár kar mér mwanap pourou mono.^u ⁴Am arop fárákap te koumteou fárákapént kwatae ninik moi naponono. Am fárákap yiki kare yakápi naponono. Apae-apae némpouk Sipsis Morok akwap naerianánko te, am arop fárákap maonámpaok tukup konapono. Kwaro wae am arop fárákapapan apárokamp koumteouráp arop ou mekamp warko yamokwapeanánko, am fárákap te nae-tarápu niamp Kwaro námoku náráponoria Sipsis Moroként warko yamokwapeanánko yakáp napon.^v ⁵Am fárákap te kwekár sér moi nap, tá kwatae ankanki nap yak mono.

q 13:13-14 Mt 24:24 r 13:17 Yé 14:9-11 s 14:1 Yé 3:12 t 14:2 Yé 1:15 u 14:3 Yé 7:4
v 14:4 Je 1:18

Ensel yininkaopwerao kar sénap kar

⁶Tá ono nke nanko, ensel ankwap yámar mek furukarea akwap. Mao te yaká yak konámp Kwapwe Kare Kar samp námpao, am Kwapwe Kare Kar apárokamp kounteouráp aropan farákáp. Mao am kar farákáp námp te ponankor pourou yipiráp, ponankor arop firan, tá ponankor karrápan, tá ponankor apár mekamp aropan farákáp námpono. ⁷Mao tékén arakrá sér, “Kwaro ponankor aropan youroukouprá kot naenámp ke te wae korop námpono. Aenámpara, yumo te ankár man apápria maomp e narek sampok kipo. Yumo ankár yámar me ntia apár, tá solwara, tá ént oukurnámp ponankor yoroinámp Kwarén lotu kipo.”

⁸Ensel ankwap manénkirkamp enselén éntér paprá korop. Am wakmwaek koropnámp enselo sérrá, “Némp tokwae Babilon te wae kwatae akwap námpon. Ye, am te wae kwatae akwap námpon. Am némp Babilon támao ponankor kounteouráp aropan nánko, maomp kárakáre kor kokopor ninikaok tukup napono. Am tak námp te mao kárakáre kor wain ént nénk nánko, am fárakapao fánap niampon.”

⁹Tá ensel ankwap am anánkaopweramp wakmwaek korop. Am yinink ensel támao tékén arakrá wumwi, “Táte arop ankwap yao pwae mekamp fir ntia maomp wunériran loturia, maomp taok paprá kumwi námp maomp yépe kor fek, tá maomp yaek sámp námp te, ¹⁰mao te Kwaromp yonkwae pwarámpnámp wain ént ankwap fánaenámp. Kwar te am wain ént ént karént tapokwapea pap moi námpon. Mao te náráp yonkwae pwarámpnámp kap mek kwarákárria am arop fárakapan nopok nénk nánko, ankár fár mwanapon. Tá am arop fárakap, yiki kor ensel fárakap nke nap fek, tá Sipsip Morokao kor nke námp fek yumwi salfa fek yurunknámp yaomwi mek touwe kwatae sámp mwanapon.^x ¹¹Tá am yaomwi meknámp aoknámp sourirao am fárakapan touwe sánkria am te narek pok saráp yaká yak naenámp. Am arop fárakap am yao pwae mekamp fir ntia maomp wunériran loturá, tá maomp e fekamp kumwi sámprá, mak i konap arop fárakap te anepér mono. Wae fek, tá kumuruk ankár touwe sámpá yakáp mwanapon.”

¹²Táte take pourouráp ankank korop nánko te, Kwaromp kounteouráp arop fárakap te ankár kárakáre fek fokopeyakáp mwanapon. Am kounteouráp arop fárakap te Kwaromp loaok tukupria Jisasén mér nap kárakáre fek sámpá yakáp mwanapon.^y

¹³Tá ono wa nanko, yámar meknámp kar ékria arakrá sér, “Amo kar arakrá kumwiae: Koumteouráp arop fárakap oukoumwan, tá wakmwaek, Tokwae Karamp tére térerá tukupria am meknámp sumpwi nap te, am fárakap fwap warákár mwanapon.” Yiki Kor Spiritao kor sérrá, “Ye! Am fárakapao tére tokwae nap fek te fwap anepér sámp mwanapon.

^w 14:8 Yé 18:2-3 ^x 14:9-10 Yé 13:11-17; 19:20; 20:10,15; 21:8 ^y 14:12 Yé 13:10

Am fárákap te kwaporok tukup mono. Kwapwe kare niniki nap te am fárákapént yak nánko Kwaronámpok tukup napon.”^z

Kwaromp yonkwae pwarámp apárok ék naenámp kar

¹⁴Ono warko nke nanko, kouwme wupwi kor yak nánko, am mek arop ankárank tank námpao maok, maomp pourou te Aropamp Táráp niamp. Maomp me korok te gol fekamp kump woukwapá yakria, mao asmaok wiráp kare yaek fákeyak.^a ¹⁵Tá ankwap ensel Yiki Kor Nap meknámp ek korop. Mao am kouwme mek tanknámp aropan tékén arakrá wumwi: “Amo waráp asmaok fek fir fékérae! Apárokamp fir ponankor wae noumouri námpono. Aenámpara, oukoumwan má ke fek te fir tére mwanap kenono.” ¹⁶Aeránko am kouwme mek tanknámp aropao náráp asmaok fákeyakrá apárokamp fir wae yápaie námp am kar féké.

¹⁷Tá ankwap ensel yámar mek yak námp Yiki Kor Nap meknámp ek korop. Mao kuri asmaok wiráp kare yaek samp. ¹⁸Tá yaomwi poukwapnámp kárakáre sampnámp ensel ankwap alta pwarará korop. Mao asmaok wiráp kare sampnámp enselén tékén wumwiria sérrá, “Amo am waráp asmaok wiráp kare fek ponankor apár mekamp wain ki fékéria ankwap fek koupoukourae. Maomp ki te wae ponankor noumouri námpono.”^b ¹⁹Aeránko maok, am enselo náráp asmaok sámp-fákeyakrá wain ki fékéria koupoukour. Tá am wain ki yumwi fekamp tang tokwae mek pumpurékamprá fákam mwaria am mek tirá épér. Am te Kwaromp yonkwae pwarámpo.^c ²⁰Tá ensel fárákapao am tang taun tokwae younkwe mwaek yak námp mek wain ke pumpurékamprá ént fápámp. Aenapo, am yiri tang younkwe mwaek kwarákárria fopweanápi akwapea 300 kilomita fek, tá narek pokea hos top kor fek yaknámp ain fek yak.

Fákánek enselo fákánek ankank kwatae fákeyakápnap kar

15 ¹Tá wunéri tokwae ankwap yámar mek korop nánko, ono nkea am táman ninik tokwae. Ono am nke namp te ará: Fákánek ensel fákáre arop kwatae pap mwanap fákánek ankank kwatae ti-fákeyakáp. Táte nánkár am ankank kwatae pwar nánko te, wakmwaek ankwap korop mono. Am fákánek ankank kwatae fek waeman Kwaromp yonkwae pwarámp wae pwar námpon.^d

²Tá ankwap ankank solwara tokwae niamp nke. Am te yaomwi yurunkao glas mek yak nánko, nke nap niamp. Tá ono nke nanko, arop fárákap am yao pwae mekamp fir ntia maomp wunériran yorowaria kwe-pwarará, tá am yao pwae mekamp fir, maomp e fi kouroumprá kumwi nap apárok sámp-anámpapono. Am fárákap glas niamp

^z 14:13 Hi 4:10 ^a 14:14 Yé 1:13 ^b 14:15,18 Mt 13:36-40 ^c 14:19 Yé 19:15

^d 15:1 Yé 15:6-7

solwara fik foukouri yakáp napo, Kwaro warákárria am fárákapan gita nénká pwate nánko, tá am fárákapano tia yakáp. ³Aeria am fárákapano Kwaromp tére arop Moses ntia Sipsip Morokamp tár sámp. Am tár te ará:

“Tokwae Kar, amo ponankor kárákáre tokwaeráp Kwarono. Ponankor tére amo tére nap te tokwae kar nánko, yino nkea ninik tokwae námpon. Amo ponankor arop firamp King, tá waráp ninik am te ponankor yae-párákria kare karono.^e

⁴ Tokwae Kar e!

Amo ankárankampao saráp amo yiki kare yak napon. Aenapara, arop ponankor amwan apápria, waráp e narek sampok mwanapon. Ponankor arop fi koropea amwan lotu mwanapon. Am te apae riteanápe, waráp yae-párák kare ninik te wae érik korop námpon.”

⁵ Am pwar nánko, ono warko nke nanko, yámar mek yaknám Yiki Kor Nap yak. Am yaknám Nap Aokore Yiki Kor Kare ménki kikir akwap.^f ⁶ Tá am fákánek ensel fákánek ankank kwatae arop kwatae pap mwanámpria nap sámp-fákeyakáp nap, am Yiki Kor Nap pwararea ek mank. Am fárákapan te waempyam kwapwe kare yinka waeria waentar kwapwe nám kápéria, tá mao parák gol par-sorowaria yakáp. ⁷ Tá yiworaopwe ankank yiki yakápnap ou mekamp ankwap ankárank, mao fákánek dis gol fákánek enselén nénk. Tá ankár yiki yaká yaknám Kwaromp yonkwae pwarámp, am te am fákánek dis mek top-pwarámpá yak námpon. ⁸ Tá Kwaromp kárákáre ntia maomp waeramp souri Yiki Kor Nap mek top-pwarámpá yak. Tá arop ankwap am Yiki Kor Nap mek yoump naenámp pourou mono, nánkár am fákánek enselo fákánek ankank kwatae térea pwaranápono.

Fákánek dis mek Kwaromp yonkwae pwarámp yaknám kar

16 ¹ Tá Yiki Kor Nap meknám kar ankwap korop nánko, ono wa. Mao arakrá tékén am fákánek ensel táman wumwiria sérrá, “Yumo ankár tukupea am fákánek dis Kwaromp yonkwae pwarámp am mek yak nám tirá apárok kokorarenke!”^g

² Aeránko, ensel ankárankao akwapea náráp dis sámprá apárok kwarákár. Aenáno, nkwakwe make kárákáre kor ankáráp kwatae kare yao pwae mekamp fir ntia maomp wunérian lotu i konap taok papnám kumwi yaknám aropamp pourouk koropánk.^h

^e 15:3 Lo 32:3-4; Yé 16:7 ^f 15:5 Hi 9:3 ^g 16:1 Sef 3:8; Yé 16:17 ^h 16:2 Kis 9:10; Yé 13:11-17

³Tá ensel anánkao náráp dis solwara mek kwarákár. Tá solwara sumpwi aropamp pouroukamp yiri niampi akwap nánko, solwara mek yakápnap ankank ponankor surumpwi pwar.ⁱ

⁴Tá yinink enselo náráp dis ént tokwae mek, tá ént oukurnámp mek kwarákár nánko, am ponankor yiri niampi akwap. ⁵Tá ono wa nanko, am ént taokeyaknámp enselo sérrá,

“Amo oukoumwan yak nap,
tá wokwae kar amo yakapono.

Amo yiki kareno.

Waráp kot te waeman pwi kare yak námpon.

⁶Am arop fárákap te waráp koumteouráp arop fárákapan, tá profet fákáreran tirá wour napo, am fárákapamp yiri kwarákari námpono. Aenapan, amo am kwatae arop fárákapan am yiri nénk napo, mao fár mwanapono.

Am fárákap te waeman nopok kwatae ankank sámp napon.”^j

⁷Tá ono wa nánko, alta fek yaknámp ensel arakrá wumwi:

“Kare! Tokwae Kar,
amo te Ponankor Kárákáre Tokwaeráp Kwarono.
Amo koumteouráp arop fárákapamp ninikan youroukouprá kot nap,
tá waráp kot te kare kar,
tá ponankor yae-párák kareno.”^k

⁸Tá yiwor enselo náráp dis yámaran kwarákár nánko, Kwaro am arop fárákapan yámaramp yaomwi touwe fek numwar nánakáranorianánko, tak námpon. ⁹Am yámaramp yaomwi tokwae te kéntia waeria am arop fárákapan nánakár námpono. Aenámpao maok, am fárákapao am Kwar kárákáre tokwaerápao am ankank kwatae tére námp man wouroump-séria, kwatae ninik pwarará Kwaromp e narek sampok mo napon.^l

¹⁰Tá éntik enselo náráp dis yao pwae mekamp firamp sia king fek kwarákár. Aenánko, maomp yae ankore mek yakápnap arop firan kirikip tokwae korop. Aenánko, am fárákap touwe kwatae sámpria am táman námokuráp sérékam fek youroukwe.^m ¹¹Am fárákapao náráp pouroukamp touwe, tá ankárápan ninikria yámar mekamp Kwarén wouroump sérar. Aenapao maok, náráp kwatae ninik nap younkwe sirarrá Kwaronámpok korop mono.

¹²Tá tokwam enselo náráp dis ént tokwae Yufretis mek kwarákár. Aenánko, ént ponankor torokwari pok nánko, yámar aoknámp mekamp

ⁱ 16:3 Kis 7:17-21 ^j 16:6 Yé 17:6; 18:24 ^k 16:7 Yé 19:2 ^l 16:9 Yé 9:20-21

^m 16:10 Kis 10:22

king ntia ami fákáre korop mwanap mwae kup nánapi yak. ¹³Tá ono nke nanko, kwatae spirit yininkaopwe péni niamp ankwap wunépiramp táp meknámp korop, tá ankwap yao pwae mekamp firamp táp meknámp korop, tá ankwap kwekár profetomp táp meknámp korop. ¹⁴Am kwatae kare spirit te nkwakwe make kárákáre yorororia, mao te apárokamp ponankor aropamp kingonámpok tukup. Mao te tukupea am fárákap ntia maomp ami fákáreran ankára mek koupoukarea pwate nánko, am ponankor kárákáreráp Kwaromp yae tokwae fek yorowar mwanaprianámpom.ⁿ

¹⁵“Wawenke! Ono arop mér monámp ke fek oukun naenámp aropao koupour korop konámp araknámp yumonapok korop nanae! Aenanko, táte arop amp moria, maomp waempyam fu fwapi poporakor karia yáarak námp te, arop fárákapao maomp pouroukamp ankank nke moi napara, am arop te fwap warákár naenámpom.”^o

¹⁶Tá am kwatae spirit fákáre king ntia ami fákáre éréképá koroepa Hibru kar fek ‘Armagedon’rá sér i konap fek koupoukarrá pwar.

¹⁷Tá fákáneek enselao náráp dis sámprá ouwipár yak námp mek kwarákár. Aenánko, Yiki Kor Nap mek Kwaromp sia king feknámp kar ankwap tékén arakrá sér, “Oukoumwan te wae pwarane.”^p ¹⁸Tá mékér wae pouri akwap nánko, tá pourouk tokwae korop nánko, oukurér tokwae párákap, tá némp yérur tokwae korop. Am némp yérur te yoporop tokwae, tá kápae kare por apárok yakápnap arop wokwaek take pourouráp koropámp nke moi napan korop námpono.^q ¹⁹Aenánko, am taun tokwae yinink mwaek torokopi akwap nánko, kápae kare arop firamp taun tokwae apárok torokopi pikria kwatae akwap. Tá Kwaro taun tokwae Babilonomp ninikan ninikria nopok man kap wain fáraeria fopwaoka wae námpono. Am wain te Kwaromp yonkwae pwarámp tokwae karonu.^r ²⁰Tá solwara mekamp apár amor ke ént mek wae fopweri pikrink. Tá faonkwe ankwap ankáránk warko yak mono. ²¹Tá warákam ais tokwae kar ékrink. Ponankor am ais faokore ankákáránkamp kápae te 50 kilogram niamp arakeno. Am yámar meknámp arop pourouk éká pépér nánko, arop fárákap am warákam ais fek tapek touwe kwatae sámp napon. Tak nánko, am arop fárákap námwan ais warákamao fupuknámp fek táman Kwarén wouroump-sérar napon.^s

Kwaro kokopor yupuan kot naenámp kar

17 ¹Ensel fákáneek, fákáneek dis fákeyakápnap ou mekamp ankwap ankáránk koroepa onan sérrá, “Amo koropae! Mámá kokopor tokwae konámp yupu, mao te narek kápae kare ént tokwae yumuntuk tank námp, nopok touwe kwatae sámp naerianámp, ono amwan yéknép

ⁿ 16:14 1 Ti 4:1; Yé 19:19 ^o 16:15 Lu 12:37-40; 1 Te 5:2; Yé 3:3 ^p 16:17 Yé 16:1

^q 16:18 Yé 8:5 ^r 16:19 Yé 14:8-10 ^s 16:21 Kis 9:24; Yé 16:9,11

nae rae. ²Apárokamp king fákáre méntér kokoporrá paokopi napon. Tá apárokamp arop ponankor mao kuri méntér kokoporrá paokopria, mánmán ént fépéria ni konapnám épépérép napon.”^t

³Tá Yiki Kor Spirit onomp pourou mek koropá kárákáreria onan kakapea kwar saráp mek sakwap. Aenánko, ampok ono nke nanko, yupu ankárankamp yao pwae mekamp noumouri kor firamp yumuntuk tank. Am yao pwae mekamp firamp pourouk te kápae kare e kárámpá top-pwarámpá yakáp. Am e ponankor te Kwarén nkwakwe make wouroump-sénap eno. Tá am yao pwae mekamp fir te fákánek me korráp, tá fére-sámpramp souwe fákánek me korok aokrángi rámp.”^u

⁴Am yupu te anánkaopwe pourouráp waempyam noumouri yirimpea, tá nkwakwe make gol fekamp mopor yirir, tá kwapwe kare yumwi ntia mani tokwae fekamp anani kor” yirimp. Tá mao gol fekamp kap yaek samp-tank. Tá nkwakwe make ninik Kwaro nke námpe fek mákáre kare námpe, tá nkwakwe make oumnámpe ankank am yupuamp kokopor ninik fekamp, am ponankor am kap mek top-pwarámpayak. ⁵Tá maomp e mao námokuráp yépe kor fek kumwi tenapo yak námpe te am e fi te wounáp karonó. Maomp e kare te ará: “Taun tokwae Babilon. Mao te ponankor kokopor koumteou, tá Kwaro nke námpe fek mákáre kwatae konap apárokamp ninikamp éntupwar karenono.” ⁶Am yupu te Kwaromp koumteouráp arop fárákape, tá arop fárákape Jisasén méria maomp e farákápnape arop fárákapan tirá wouri námpon. Tá ono am yupuan nke nanko, am fárákapamp yiri fária mánmán nánko nke nampono. Ono am nkea korokop tokwaeria ono ninik tokwae.

⁷Tá enselo onan sérrá, “Amo apaeritea ninik tokwae rape? Ono amwan am yupuamp kar fi mek yak námpe yéncép nae. Tá am yao pwae mekamp fir fákánek me korráp, tá souwe fére-sámpramp rap mao am yupu sámpea akwap námpe yéncép nae. ⁸Am yao pwae mekamp firan wae nkeapan maok, oukoumwan te yak mono. Aenámpan maok, nánkár wakmwaek am fi tikip monámpe me éri tokwae pwarará narek aokea ponankor moyak naenámpon. Apárokamp arop ankwape fárákape Kwaro am fárákapan e wokwaek apár yoro mo námpe fek yiki yakáp mwanape aropamp buk fek kumwi mo námpe, am arop fárákape am yao pwae mekamp firan nkea ninik tokwae mwanapon. Am te apae riteanápe, mao wokwaek yakámpao maok, oukoumwan yak moitea, nánkár wakmwaek korop naenámpon.”^w

⁹Yonkwae kourráp arop te fwape máná ankank mér kare naenámpon. Máná fákánek me kor te fákánek faonkwean wounáp niamp nánko, am yupu narek fákánek faonkwe wi fek tank námpon. Tá am fákánek me kor te fákánek kingén wounáp námpon. ¹⁰Éntik te wae moyakápe napo, ankárankamp mwar

^t 17:2 Yé 18:3 ^u 17:3 Yé 18:24 ^v 17:4 ‘Mani tokwae fekamp anani kor’rá sénámpe fi te Matyu 13:45 fekamp kar fi nkeampo. ^w 17:8 Yé 13:8

oukoumwan king yak nánko, ankwap ankárankamp te oukoumwan king yak mono, nánkár wakmwaek kánanke kwarok ke fek saráp king yakea pwar naenámpon. ¹¹Tá am yao pwae mekamp fir wokwaek yakámp, oukoumwan yak mo námp, am te yukupao yaknámp kingono. Aenámpao maok, mao te fákánek kingént ankárankamp fi ara, ponankor kwatae akwap naenámpon.

¹²Tá amo fére-sámpramp souwe nke nap am te fére-sámpramp kingén wounáp námpon. Am fárákap te oukoumwan king yakáp mo napao maok, man kárákáre sánk napo, yao pwae mekamp firént tapokwapea ankárankamp ke fek saráp king yakáp mwanapon. ¹³Am king fárákap te námoku ankárankamp ninikráp sarápon. Am fárákap te e tokwae ntia kárákáre tokwae te am yao pwae mekamp firan ponankor sánk mwanapon. ¹⁴Am fárákap te Sipsip Moroként yorowar napo, Sipsip Morokao am fárákapan kwe-pwar naenámpon. Am te apae riteanápe, mao te ponankor tokwae kar yakápnap arop fárákapamp Tokwae Kar, tá ponankor king fákáreramp Kingara námpon. Tá arop ponankor méntér yakáp nap te mao wumwiria narápono ritenánko, am fárákap maomp karwaok kar tukup konap, am fárákapao kor Sipsip Moroként yorowar kwe-pwar mwanapon.”^x

¹⁵Tá am enselo onan sérrá, “Amo wae nke napono, mómá kápae kare ént tokwae kokopor yupu am yumuntuk tank námp te, am te ponankor apár mekamp arop fi, tá tokwae kar arop fi koupoukarea yakáp nap, ponankor pourou yipiráp, tá ponankor karráp arakia yakáp nap támaono. ¹⁶Am fére-sámpramp souwe amo nkenap, am te ponankor am yao pwae mekamp firént tapokwapea kokopor yupuan ampwae sámp napon. Am fárákapao man sámpá yampourouria maomp waempyam ankank ponankor pouroukoup napo, pourou mwar yak naenámpon. Tá am fárákapao maomp pouroukamp émi fária man ponankor yaomwi mek yankap mwanapon.”^y ¹⁷Ye! Kwaro am fárákapamp ninik mek tak mwanap ninik nénk nánko mwanapon. Wokwaek tak mwanaprá séri tari námpan napon. Am fárákap te ponankor ankár pourouráp ninik fek saráp am kárákáre kingo námpan sámpea am ponankor yao pwae mekamp firan nénk mwanapon. Am fárákap te ankár takrá tukupea napo, Kwaro tak nanamprá sérinámp ankank pwi naenámpon. ¹⁸Tá am yupu amo nke nap te, am taun tokwae apárokamp ponankor kingén poukwap námpan wounáp námpon.”

Babilon kwatae akwapnámp kar

18 ¹Wakmwaek am pwar nánko, ono nke nanko, ensel ankwap yámar mek pwarará apárok ék. Mao te kárákáre tokwaerápao, maomp mopor te apárok wae tákapa wae. ²Mao tékén kar arakrá sér, “Taun tokwae Babilon wae kwatae akwapáne. Mao te wae kwatae akwap teane.

^x 17:14 Yé 19:11-16,19-20 ^y 17:16 Yé 18:8

Oukoumwán te am taun te
 kwatae-spirit fákáreramp taun yak námpon.
 Kwatae-spirit fákáre,
 tá ounnám ant fákáre,
 tá kwatae kare ant fákáre,
 támao kuri am mek yakáp napon.

³ Am te apae riteanápe,
 ponankor fi méntér kokopori napon.

Am te ará:

Am ponankor arop fi méntér kokopor ninik nap te,
 am fárákap kárákáre kor wain ént fánap niampon.

Tá apárokamp king fákáre
 mao kor mént kokopori napon.

Tá apárokamp bisnis arop fárákap
 mani sámp mwanap térerá

am yupuamp nkwakwe make kikiank ninik tokwae fek
 mani tokwae ti napon.”

⁴ Tá ono wa nanko, yámar meknám kar ankwap arakrá sér,

“Onomp koumteouráp arop fárákap,
 yumo ankár am taun pwararea ek koropenke!

Takria yumo maomp kwatae niniként
 tukupá tapokwap mwanape.

Tá yumo méntér tapokwapria yumo énéni
 kwatae ninik fek nopok sámp mwanape.^z

⁵ Maomp kwatae ninik te
 yu tokwae koupoukarrá poka yámar mek námpon.

Kwar te am taunamp kwatae ninik ponankor te
 waeman niki yak námpon.

⁶ Yumo ankár am kokopor yupuamp
 nkwakwe make kwatae ankank fek
 ankár nopok kor, take pourouráp fek pwi pap mwanapon.

Mao yumwan mokope pourouráp kwatae niniki nám te,
 nopok kuri am yumuntuk ankwap koukoumoumpia sánkenke.

Mao te wae kárákáre kor mánmán ént
 kap mek ouroukoupea yumwan sánk námpon.

Yumo ankár maomp kap mek
 kárákáre kor mánmán ént ankwap
 koukoumoumpia sánk napo, fárano.^a

⁷ Mao námokuráp e sakapria
 kápae kare nkwakwe make ankank

^z 18:4 2 Ko 6:17 ^a 18:6 2 Te 1:6

námokuráp pourouk warákár sánk naenámpan saráp
tére konámpon.

Aenámpara, yumo ankár kápae kare touwe sámpea
éma wae naenámp nopokinámp niamp take sánk kipo.

Mao te námokuráp ninik mek sérrá,

‘Ono te Kwin yakria

sia kwin fek tank namp’rá sér i konámpon.

‘Námo te kae yupu niampao kwaporok yak nampanápe.

Námwan te touwe kwatae korop nánko,

námo ém mo kareno’rá sér i konámpon.

⁸ Aenámpan maok,

nkwakwe make kwatae kare ankank

man ankárankamp yae fek saráp korop naenámpon.

Nkwakwe make touwe tokwae korop nánko,

kápae kare arop éménka wae,

tá yae-porokwe tokwae korop naenámpon.

Tá Babilon te ponankor yaomwirao fánaenámpon.

Ye! Am te apaeritea námpanápe,

Kárákáre Tokwaeráp Kwar Tokwaerao

maomp kwatae ninik waeman youroukoupí námpan,

‘Nopok touwe kwatae sámp naenámp’rá sénámpon.’^b

⁹King fákáre mao am taun tokwaerént méntér kokopori nap, tá méntér nkwakwe make kápae kare ankank sámp napan saráp tére napon. Aenámpara, am king fárákap man yaomwirao fánánko souri korop námp nkea, am fárákap náráp éntér kor fek yae poporokwaprá éménk mwanapon. ¹⁰Mao am touwe kwatae sámp nánko, am fárákap námoku kor am take touwe sámp mwanapara, apáp tirinka waeria panek foukouri yakáprá arakrá sér, “Koupouteane, koupouteane, Babilon koupouteane. Am taun tokwae, amo kárákáre kor taun nono. Ankárankamp ke fek saráp nopok touwe kwatae amwan koropáne.”^c

¹¹Tá apárokamp bisnis arop fárákap am taun támantá éménkrá yonkwae touwe napon. Am te apae riteanápe, arop maomp ankank tirá, mani nénk mwanap arop warko yak mono. ¹²Am ankank te gol, silva, kwapwe kare yumwi, mani tokwae fekamp anani kor, tá wupwi kor waempyam kwapwe, tá nkwakwe make noumouri kor waempyam, tá waempyam waentar fekamp aráno. Tá kápae kare nkwakwe make nánákáre kwapwe konámp yao, tá ankank ponankor elefan souwe fek yoroinap, tá ankank ponankor mani tokwae fekamp yao fek yoroi nap, tá bras, tá ain, tá kukumwi kwapweráp yumwi fek yoroi nap. ¹³Tá ankwap te ará ankank: Sinamon, tá fári konap far, tá yankap konap paura

^b 18:8 Yé 11:17-18 ^c 18:9-10 Yé 19:2-3

nánákáre, tá nkwakwe make wouri nánákáre, tá sanda kwapwe, tá wain, tá wel, tá pan kwapwe, tá wit, tá bulmakau, tá sipsip, tá hos ntia karis, tá slev yak naenámp arop, maomp ninik ntia pourou mani fek sámp konap. Mámá ankank warko mani fek te mono. ¹⁴ Bisnis tére konap arop fárakap arakrá man sér mwarea napon: “Am kwapwe kare ankank amo sámp nae kar ri konap te, waeman ponankor amwan pwar-akwap tenámpon. Waráp mani tokwae fekamp kwapwe kare ankank ntia waráp kwapwe kare mopor ankank te, wae ponankor amwan pwar-akwap námpon. Amo am ankank warko sámp mono.”

¹⁵ Tá bisnis arop fárakap am ankank takrá téreria am taun mek mani kápae kare tákap konap arop fárakap te am taun tokwaerao touwe tokwae sámp nánko, nkea námwan am touwe kwatae korop naenámpan apáp tirink mwanapon. Tá am fárakap panek fokouri yakáprá éménkrá yonkwae touwe tokwae mwanapon. ¹⁶ Am fárakapao sérrá, “Koupouteane, koupouteane, am taun tokwae koupouteane! Wokwaek mao te wupwi kor waempyam yirimp, tá nkwakwe make noumouri kor waempyam, tá maomp pouroukamp mopor kwapwe, gol, tá yumwi kwapwe ntia mani tokwae fekamp anani kor yiriria yakámpon! ¹⁷ Aempan ankárakamp ke fek saráp takánko, maomp ponankor mani, tá am mopor ankank ponankor kwatae akwap tenámpon!”

Tá sip mekamp kepten ponankor, tá ponankor arop mani fek sip mek kounkouria ankwap némpouk tukup konap, tá sip mek tére konap arop ponankor, tá arop ponankor solwara mek mani tákap mwanap tére konap, am arop fárakap panek fokouri yakáp mwanapon. ¹⁸ Tá am fárakapao nke napo, am taun wouroukour-námp yaomwi souri nkea arakrá wumwi, “Apae taun mámá taun tokwae niamp yak námpon?” ¹⁹ Aeria am fárakap woup kwar yokwaprá námokuráp me korok épérrá yonkwae touweria éménk. Tá am fárakapao wumwirá, “Koupouteane! Mámá taun tokwae koupouteane! Kápae kare sip solwara mek paokop nap, mámá taun tokwae mekamp mani tokwaeráp yakáp i konapono. Koupoute kare, ankárakamp ke fek saráp am ponankor kwatae akwapáne!”

²⁰ Ankwapao kar arakrá sér: “Yumo yámar me ntia Kwaromp koumteouráp arop fárakap, tá yumo aposel, tá profet, yumo ponankor fwap oukoumwan mámá ankank am taun mek korop námp warákáránk mwanapono. Kwaro man youroukoupia nopok touwe kwatae sánk námpono. Tá amnámp ninik te am taun támao yumwan kwatae sokoroi nap fek námpon.”^d

²¹ Am kar pwar nánko, kárakáre kor ensel ankwap yumwi tokwae ankárak wit yánk nounounkrá aokop konámp tokwae niamp sámpea,

^d 18:20 Yé 19:1-2

mao am yumwi tokwae kakapea solwara mek sir. Aeria mao sérrá, “Ono mámá yumwi sinamp máte nánkáráp taun tokwae Babilon mámáknámp kárákáre kare fek sinapo, arop fárákap warko nke mo mwanapono. ²²Aeria gita aráp, tá nkwakwe make musik, tá poum ke mek fokop nap, tá wur foukour nap, take pourouráp arápánk te, arop fárákapao warko amo yak nap meknámp tak nánko, wa mono. Tá arop ponankor nkwakwe make tére méria yakápnáp aropao amo yak nap mek warko take pourouráp arop nke mono. Wit sokwapnámp yumwi ounk te warko yak nánko, arop fárákap wa mono. ²³Aropao amo yak nap mek amp lam wae te nke mono. Tá amo yak nap mek tameknámp poumarop yupu sámp naenámp kar, tá yupu poumou nap mek tank naenámp kar wa mono. Wokwæk waráp bisnis térenap arop fárákap apárokamp arop nununkwi yakápi naponó. Ta kápae kare arop fárákapan amo foupourrá kwekár sérari naponó.”

²⁴Ta Kwaro am taun nke nánko te, profet fákáre, tá maomp koumteouráp arop tirá wourinap kwatae ninik te am taun mek yak námpon. Apárokamp arop ponankor yopor aropao tirá wouri nap am támao kor am Babilonomp pourouk sarápi yak námpon.

Yámar mek arop fárákap warákár tokwaenap kar

19 ¹Am takianánko, wakmwæk ono wa nanko, yámar mek yakápnáp koumteouráp arop ou tokwaeramp wumwi kar tokwae korop. Am fárákapao sérrá, “Nomo Kwaromp e narek sampok mwaro! Nomp Kwar te mao ankárankamp támao saráp námwan warko érékép námpon. Mao e tokwae, tá kárákáre tokwaerápono. ²Kot mek te Kwaro arop fárákapan kwapwe kare ninik fek yae-párák kare youroukoup i konámpon. Am kokopor yupu am te apárokamp kápae kare aropan náráp kokopor ninik fek kwataerá kák námpono. Aenámpantá, Kwaro nopok man touwe kwatae sánk námpono. Am yupu támao Kwaromp tére arop fárákap tirá wouri tae rinámpantá Kwaro nopok mao kwatae niniki námp fek érou námpono.”^e

³Tá am fárákapao warko arakrá wumwi, “Nomo Kwaromp e narek sampok mwaro. Am némp tokwae wouroukournámp yaomwi souri yámar mek pok saráp yak námpon.”^f ⁴Tá 24 taokeyakáp konap arop ntia yiaworaopwe ankank yiki yakáp námp am fárákap Kwaromp wonae fik pourou méntér éntér mwaeknámp tukuprá Kwaro sia king fek tank nánko, man lotu. Aeria am fárákapao sérrá, “Kare karono. Nomo Kwaromp e narek sampok mwaro.”^g ⁵Tá Kwaromp sia king feknámp wumwinámp kar koropria arakrá sér, “Yumo Kwaromp tére arop, tá yumo párák kar yakápnáp arop, ntia yumo e tokwaeráp arop

^e 19:2 Yé 6:10 ^f 19:3 Yé 14:11 ^g 19:4 Yé 4:9-11

fárákap yumo Kwarén apáp i konap, yumo ponankor Kwaromp e narek sampokenke!”

Sipsip Morokao yupu sámpria fir kékérounám kar

⁶Tá ono wa nanko te, kounteouráp arop kápae kare fi koupoukarrá yakáprá kar ounka wae nap niamp korop. Tá ént ounk kápae karerao souroukoup tokwae nám niamp, ta oukurér tokwaerao pourounka wae nám niamp. Am wumwi kar arakrá sér,

“Nomo Kwaromp e narek sampok mwaro!

Tokwae Kar te

mao nomp Kwar Ponankor Kárákáre Tokwaerápono!

Oukoumwán te mao King Tokwae yak námpon!^h

⁷Oukoumwán te nomo fwap yonkwae kárámpria warákára waerá maomp e narek sampok mwanámpono!

Sipsip Morokao yupu sám naerianám ke te wae korop námpon!

Tá maomp yupúao kor wae nánapi yak námpon.ⁱ

⁸Tá Kwaro man waempyam wupwi korao yiki kateria waentar kwapwe nám man sánk nánko, maomp pourouk yirimp.”

Am kwapwe kare wupwi kor waempyam te Kwaromp kounteouráp arop fárákapainap yae-párák kare niníkan sénámpon.^j

⁹Tá onan enselo sérrá, “Amo mómá kar kumwiae: Am arop fárákap Kwaro Sipsip Morokao yupu sámpria fir kékérou nám fek koropenkria wumwinám arop fárákap te fwap warákár mwanapono.” Tá mao onan sérrá, “Mómá kar te Kwaromp kare kar karonu.”^k ¹⁰Aenánko, ono enselomp puk wonae fik piká párákápria man lotu naeria nanko maok, mao onan sérrá, “Amo taki kwapono! Ono te amo ntia waráp ankwapyaenáp Jisaso farákápnám kar kárákáre fek sám fákeyak nap, yumont ankárankamp tére aropono. Amo ankár Kwar ankárankan saráp lotuampo. Am kare kar kar Jisas námoku farákáp nám táman, Yiki Kor Spiritao sámpea profet fákáreran niník nénk nánko, Jisasomp e érik farákáp konapono.”^l

Arop wupwi kor hos fek narek tanknám kar

¹¹Tá ono nke nanko, yámar me kikir akwap nánko, wupwi kor hos ankárankamp yak. Arop am fek tank nám maomp e te ará: ‘Arop námoku térenám ankár pwar mo i konám’, tá ‘Kwapwe kare niník fek saráp i konám Arop’. Táte mao kounteouráp aropan kotrá youroukoup

^h 19:6 Yé 11:15-18; 14:2-3 ⁱ 19:7 Yé 21:2,9 ^j 19:8 Ais 61:10 ^k 19:9 Lu 14:15

^l 19:10 Yé 22:8-9

námp, tá mao yorowar naerianámp, mao te ankár yae-párak kare ninik fek saráp i konámpon. ¹²Maomp yi te yaomwirao yurunk námp niamp, tá mao te kingamp kump kápae kare maomp yépe kor fek yakáp námpon. Maomp pourouk e kumwi tenapo yak námp, am te mao námoku saráp mér námpono. Arop ankwap te mér mono.^m ¹³Maomp waempyam éri te yiri forokwap rámpan yirimp námpono. Tá maomp e te ‘Kwaromp Kar’.ⁿ ¹⁴Yámar mekamp ami fákáre te náráp wupwi kor hos fek tankápria, am fárakap maomp wakmwaek tukup. Am fárakapamp pourouk yiririnao waempyam te wupwi korria yink kwapwe námpono. ¹⁵Maomp táp meknámp bainat wiráp kare yak námp, am bainat ek oukur korop. Aenánko, mao ponankor arop firan am bainat fek tapek yorowaria kwe-pwar naenámpono. Tá mao ain yaopwae sámpea koumteouráp aropan kárakáre fek poukeyak. Mao yumwi fekamp wain ki fákap konap tang mek pumpurékamprá wain ént fákap naenámpono. Am te Ponankor Kárakáre Tokwaeráp Kwaromp yonkwae pwarámp tokwaeran wounáprá sénámpono.^o ¹⁶Mao te maomp e maomp waempyam fu fek, tá maomp punampore kor mwaekamp waempyam fek e kumwi tenap yak námpono. Am e te ará: “Ponankor kingamp King, tá ponankor tokwae kar yakápnap arop fárakapamp Tokwae Karono.”^p

¹⁷Tá ono nke nanko, ensel ankwap yámar yokor námp mek fokopeyak. Mao ant fákáre amorik furukarea paokop napan tékén wumwia sérrá, “Yumo koropea Kwaromp fir kékérou tokwae fek koupoukourénke! ¹⁸Aeria yumo fwap king fákáreramp pouroukampi émi fár, tá ami kepten tokwae, tá kárakáre kor aropamp émi fár, tá hos fákáre ntia am fek tankápnap arop fárakapamp émi fár mwanapon. Yumo ponankor aropamp émi fépéria amwar yakápnap arop farákáp ntia slev térenámp arop fárakap, tá kwaporok yakápnap arop fárakap, ntia e tokwaeráp arop fárakapamp émi fár mwanapon.”

¹⁹Tá ono nke nanko, yao pwae mekamp fir, tá apárokamp king fákáre, ntia am fárakapamp ami fákáre wae koupoukour yakáp. Am fárakap te am hos fek tanknámp aropan yorowarrá, tá maomp ami fákárerént yorowar mwarea napon.^q ²⁰Aenapan maok, mao am yao pwae mekamp fir ntia kwekár profetéén ‘Fápákampi kák námpon. Am profet mao te wokwaek yao pwae mekamp firao nke námp fek nkwaekwe make kárakáre yororia koumteouráp aropan poupwekáp námpono. Aenánko, arop fárakap te manénkir yao pwae mekamp firamp e fek náráp pourouk kumwi tiria, maomp wunérian lotuiapon. Yao pwae mekamp fir ntia kwekár profet, am yawor te oukoumwan yiki yak nep fek yumwi salfa fek yaomwi yurunk nánko, kéntia waenámp me aokore mek épéri pwar napon.^r ²¹Tá am hos fek tanknámp arop, mao am yao pwae mekamp firamp wunérian lotunap ami fákárean am bainat éri maomp táp

^m 19:12 Yé 1:14 ⁿ 19:13 Jo 1:1,14 ^o 19:15 Yé 1:16 ^p 19:16 Yé 17:14 ^q 19:19 Sng 2:2
^r 19:20 Yé 13:11-17; 20:10

meknám̄p korop nám̄p am fek paoki pwar nám̄pon. Aetenánko, ant fákáre am arop fárákamp émi fépéria yare tokwae napon.⁵

Satan 1,000 yopwar fek fákapá yak naenám̄p kar

20 ¹Tá ono nke nanko, ensel ankwap yámar mek pwarará apárok ék. Mao te me fi tikipnám̄p yak monám̄p ménkiramp ki, tá sen tokwae makia yaek sámpá ék nám̄pon.[†] ²Mao am wunépiran sámpea yarokwap nám̄p am te wae wokwaek karkamp tákamono. Am arop támao kápae kare aropan kot i konám̄p mao te Satan nono. Tá ensel man sen fek 1,000 yopwar fek yak naenám̄pria yarokwapea pap. ³Enselo man fi tikip monám̄p me tokwae mek sámp-sirarrá yumuntuk ménki kéria kárákáre fek farákapea pwar. Aetenánko, Satan te warko koumteouráp arop fárákap poupwekáp mono. Mao te nánkár yépékia 1,000 yopwar pwar nánko, wakmwaek man aokor-pwar napo, mao fae tákáre ke fek saráp yáarak naenám̄pon.[‡]

⁴Tá ono nke nanko, sia king ankwap yakáp nánko, am fek arop ankwap fárákap tankáp. Kwaro am fárákapan arop youroukouprá kot mwanap kárákáre nénk. Tá ono nke nanko, kápae kare Jisasén méria maomp e érik farákápria Kwaromp kar kárákáre fek farákáp napo, am fek yápare kor fápákarrá épériap aropamp waemp yakáp. Am fárákap te yao pwae mekamp fir ntia maomp wunérian lotu mo, tá maomp taok papnám̄p kumwi am fárákamp yépe kor fek ntia yaek yak monap arop fárákap támaono. Am sumpwinap arop fárákap warko yiki yak sámpea Kraisént king yakáprá tukupea 1,000 yopwar fek napon.[¶] ⁵⁻⁶Am te manénkir arop fárákap apár me meknám̄p warko ferámpnap keno. Am arop fárákap manénkir ferámp nap te fwap Kwaro námokuráponorá nánkáráp námpara, fwap amwar kar yakáprá warákár mwanapono. Anánk por sumpwi te am fárákapan apárok tirá nér naenám̄p kárákáre yak mono. Waeman Kwar ntia Kraisomp pris fákáre yakápria, waeman Kraisént am 1,000 yopwar fek king yakáp mwanapon. (Aeno ankwap sumpwi arop fárákap te am ke fek ferámp mono. Nánkár am 1,000 yopwar yépékia pwar nánko mwanapon.)[‡]

Satan touwe tokwae sámp naenám̄p kar

⁷Wakmwaek am 1,000 yopwar wae pwar nánko, am kalabus nap ménki kikír akwap nánko, Satan fákapá yaknám̄p wae pwar naenám̄pon. ⁸Tá mao érik aokea ponankor apár mekamp yakápnap arop fárákap Gok ntia Magokomp arop firan poupwekáp naenám̄pon. Satan te am fárákapan akwapea koupoukarea éréképea yorowar naenám̄pon. Am fárákap te

⁵ 19:21 Yé 19:17-18 [†] 20:1 Yé 9:1 [‡] 20:2-3 Érik 6; Yé 12:9 [¶] 20:4 Dan 7:27; 1 Ko 6:2; Yé 6:9; 13:16-17 [‡] 20:5-6 1 Pi 2:9; Yé 2:11

kouroump mwanap pourou mono, ént mekamp kárak niampono. ⁹Tá am fárakapao kápae kare apárok mwaek koropánkria Kwaromp koumteouráp arop fárakap ntia am Kwaro warákár konámp taun sámp-saokarrá souroumpour mwanaponono. Aenapan maok, yaomwi yámar meknámp ékria am ami fárakapan ponankor wouroukoump naenámp. ¹⁰Satano am fárakapan poupwékápianámpara, Kwaro man me aokore tokwae mek salfa yumwi fek yurunknámp yaomwi touwe mek sinaenámpono. Yao pwae mekamp fir, tá kwekár profet am yawor wae am mek yak nepan, am yininkaopwe te wae fek, tá kumuruk kuri, ankár touwe tokwae sámprá yakápi-yakáp mwanapon.

Kwaro kot tokwae naenámp kar

¹¹Tá ono nke nanko, wupwi kor sia king tokwae tank nánko, am fek Kwaro tank. Tá apár ntia yámar me wokwae farákap akwap teria, warko yak mo. ¹²Tá ono nke nanko, sumpwi arop fákáre yakáp nap te, am arop fárakap te e tokwaeráp arop fárakap, tá kwaporok yakápnap arop fárakap, takia sia king wonae fik foukouri yakáp. Tá arop sia fek tank námpao, mao buk ankwapmwaek tia aokop. Mao buk ankwapan kor aok-pwar námp, am te yiki yak sámp mwanap aropamp eráp bukono. Tá mao tankrá ponankor sumpwi aropaoinap Buk fek yak námp am kumwi nkerá am fek maoianap ankank puri fek youroukoup námpono.^x ¹³Solwara warko am mekamp sumpwi arop yakáp nap tirá kérép, tá apár me ntia Waempomp Némp te am mek yakápnap waemp warko tirá kérép. Aenángo, youroukoup i konámp arop am fárakapan ponankor maoinap ankank puri fek yurukup námpono.^y ¹⁴Mao Sumpwi ntia Waempomp Némp am yaomwi tokwaeráp me tokwae éri mek tirá épér námpon. Am yaomwiráp me tokwae mek pik námp te anánk sumpwino.^z ¹⁵Táte arop ponankor maomp e yiki yakáp mwanap aropamp eráp buk fek tank mo nánko te, am aropan yaomwiráp me tokwae mek tirá épér mwanapon.^a

Kwaro yámar me ntia apár wourékam yoronámp kar

21 ¹Oukoumwan te ono nke nanko, yámar me wourékam, tá apár wourékam yak námpono. Manénkirkamp yámar me ntia apár waeman ponankor akwap tenámpono. Solwara warko yak mono.^b ²Tá ono am Yiki Kor Taun nke nanko maok, am te wourékam Jerusalem. Am taun te Kwarént yakeanámpao, yámar me pwarará apárok ék. Am te yupurao poumou nap mek tank naeria nánapria mopor i konámp niampono.^c ³Tá ono wa nanko, sia king feknámp tékén arakrá wumwi,

^x 20:12 Ap 17:31; 2 Ko 5:10; Yé 13:8; 19:5 ^y 20:13 Ro 2:6; Yé 22:12

^z 20:14 1 Ko 15:24-26,54-55 ^a 20:15 Mt 25:41 ^b 21:1 2 Pi 3:13 ^c 21:2 Hi 11:16; Yé 3:12

“Nkeae! Oukoumwan te Kwaromp nap koumteouráp arop fárákapént yak námpono! Am te am fárákapamp ou mek yak nánko, mao te Kwaromp koumteouráp arop yakáp mwanaponon. Ye! Kwar námoku am fárákapént yakea, maomp Kwar yak naenámpono. ⁴Mao fwap am fárákapamp yi mekamp émti ponankor torokor naenámpono. Aenánko arop fárákap te warko sumpwi mo, yonkwae touwe mo, éménk mo, touwe sámpono. Am wokwaekamp ankank te waeman ponankor pwate námpon.”^d

⁵Tá am Arop sia king fek tank námpon mao sérrá, “Yumo nkenke! Ono ponankor ankank te waeman wourékam yoroi pap nampono.” Tá mao warko onan sérrá, “Mámá kar te ponankor waeman kare kar ara, ponankor arop fwap mér kare mwanapon. Kumwiae!” ⁶Mao onan warko sérrá, “Mámá ponankor ankank wae korop námpon. Máte ono támao ono meki yak, tá ono wakmwaek kar yak nampono. Ono kápae kare ankankamp fi kor, tá ono kápae kare tére ponankor térea pwar konampono. Táte arop ént nikip nánko te, ono fwap yiki yak konámpon ént oukurnámpon mekamp ént man sánk nanko, fánaenámpon.” ⁷Táte arop yorowar kwe-pwarareanánko te, Ono fwap am ankank nénk nanampon. Aeria ono maomp Kwar yak nanko, mao onomp táráp yak naenámpon.^f ⁸Aeno arop apápría arári tukup, tá arop Kwarén mér te monoria younkwe sánk konap, tá nkwakwe make kwatae kare ninikráp arop, tá arop tirá wour, tá kokopor ninik, tá foupou, tá kwekár kwarén lotu, tá kwekár i konap, arak i konap arop fárákap te, maomp némp sámpon mwanap te yaomwiráp me tokwae salfa yumwi fek yurunknámpon am kénti mek pik mwanapon. Am te anánk sumpwino.”

Jerusalem wourékaman sénámpon kar

⁹Tá ensel ankwap ononampok korop. Am te fákánek ensel arop kwatae pap mwanap fákánek ankank kwataeráp dis samp nap ou mekamp ankwaponon. Tá am ensel onan sérrá, “Amo koropae! Ono amwan Sipsip Morokan yupu oukoumwan táman maomp nap mek tank námpon yéncép nae.” ¹⁰Yiki Kor Spirit onomp pourou mek koropea kárákáre nánko maok, enselo onan kakapea faonkwe tokwae fek narek karaok sampok. Tá mao onan am Yiki Kor Taun Jerusalem Kwarént yakea yámar me pwarará ék námpon yéncép.^g ¹¹Aenánko, Kwaromp wae tokwae am taun mek wae pouri yak. Am wae te mwar pourourápria mani tokwae fekamp yumwi wae niamp pourouráp. Ye! Am te yumwi jasper niampria glas niamp pourouráp koukwe kare. ¹²Am taun te yár tokwae narek karaok pok námpon. Am éntér-sámpramp ménki te yár mek yakáp nánko, éntér-sámpramp ensel am ménki ponankor wonae fik fougouri yakáp napon. Tá

^d 21:4 1 Ko 15:24-26; Yé 7:17 ^e 21:6 Ais 55:1; Jo 7:37; Yé 1:8; 22:13,17 ^f 21:7 Ro 8:14-17
^g 21:10 Ef 5:27; Yé 15:1; 21:2

éntér-sámpramp Israel firamp e am ménki fek yakáp námpon. ¹³Yámar aoknámp mwaekamp yár te ménki yininkaopwerápono. Tá yae-párák mwaek kirikiri yár te taknámp ménki yininkaopweno. Tá yae-mánkwan mwaek kirikiri yár mek te taknámp yininkaopwenono. Tá yámar piknámp mwaek kirikiri yár mek te taknámp yininkaopweno. ¹⁴Am taun yár fi mek te éntér-sámpramp yumwirao yár fi mek kárákáre sánk námpon. Tá Sipsip Morokamp éntér-sámpramp aposel fákáreramp e am yumwi fek yakáp námpono.

¹⁵Am ensel onont kar sénámp te, am taun purumpria yár ntia ménki pupur naenámp gol fekamp yaopwae sámp-fákeyak. ¹⁶Am yár fwe yiawor mwaek te ankárankamp puri fekampono. Ensel te náráp yaopwae am fek némp purumprá akwapeanámp te 2,200 kilomitanono. Am taun tokwaeran purump námp te top yawor ntia aop yawor, tá narek pok námp te, ankárankamp puri fekampono. ¹⁷Mao am yáran kor purumpea am yár ouwou te 144 metano. Am meta te arop fárákapao náráp ankank pupur i konap niampono. Tá ensel am yár purump námpao kor, am meta támaono.

¹⁸Am taunamp yár te Kwaro jasper yumwi fek yoroi námpon. Tá mao taun táman kor gol fek saráp yoroianánko, am taun te glas wae niamp wae tokwae námpono. ¹⁹Yár fi mek te Kwaro nkwaekwe make yumwi mani tokwae fekamp fek moporia pwate námpon. Ankárankamp yumwi kwapwe am yár fi mek yaknámp te jasper. Anánk te muru kor yumwi sapaia. Tá yinink te wupwi kor yumwi aget. Yiawor te yiki kor yumwi emeral. ²⁰Éntik te sadoniks yumwi am te noumouri wupwi méntérnámp. Tá tokwam te noumouri kor yumwi konilian. Tá fákánek te yar kor yumwi krisolait. Yukup te ankwap pourouráp yiki kor yumwi beril. Sárak te mwar pourouráp yar kor yumwi topas. Tá fére te yumwi krisopres. Am te yiki kor niamp, tá yar méntérámp. Mom te mwar pourouráp muru kor yumwi jasint. Tá éntér te mwar pourouráp noumouri kor yumwi ametis. ²¹Am éntér-sámpramp ménki fek te éntér-sámpramp mani tokwae fekamp anani kor yak námpono. Ménki ponankor te ankárankamp anani kor tokwae mwarono. Am taun mekamp mwae kup te ponankor gol fekamp saráp nánko, glas wae niamp koukwe faokor akwap námpon.

²²Aenámpan maok, ono te am némpoukamp Yiki Kor Nap nke mono. Ponankor kárákáreráp Kwar Tokwae ntia Sipsip Morok am yawor námoku támao am mekamp Yiki Kor Nap yak nepon. ²³Tá am taun mek te yámar ntia yunkamp wae te warko tére mono. Am te apaeria, Kwaromp wae tokwae támao am mek wae sánk námpon. Tá Sipsip Morok mao námoku am mek yokor konámp lamono.^h ²⁴Ponankor arop fi te am némpoukamp wae fek saráp paokop mwanapon. Tá apárokamp king fákáre náráp mopor ankank am mek ti-korop mwanapon. ²⁵Yámaraok am yár ménki

^h 21:23 Ais 60:19-20

te kër mono. Tá kirikip te am némpouk korop mono. ²⁶Ponankor arop firamp mopor ankank ntia mani am mek ti-korop mwanapon. ²⁷Aeno ankank ounnám, tá arop nkwakwe make pwarápaé sánk konám ninik kwatae konap, tá arop kwekár ninik i konap, am te am mek yink mo kareno. Sipsip Morokao arop ankwap fárákapamp e Yiki Yak sámp mwanap Buk fek kumwi tenám am arop fárákap mao saráp fwap am némpouk tukup mwanapon.ⁱ

Yiki yaknám ént ntia yaoan sénám kar

22 ¹Tá am ensel onan ént tokwae yéknép nám, am te yiki yak sánknám éntao maok, ént te glas niamp koukwe kare. Am ént te Kwar ntia Sipsip Morokamp sia king feknám oukarea, ²am némpoukamp mwae-párak akwap námpon. Am ént woupwiaok te maomwaek fi mwaek, tá nkamwaek fi mwaek kor yiki yak nénknám yao yakáp námpon. Am yao te ankárakamp yopwar fek éntér-sámpramp por ki tank konámpon. Ankár yunk méntép tank konámpon. Tá am yao pwae te ponankor koumteouráp arop firamp pourou mekmwaek fwapokwap i konámpon.^j ³Tá kápaé kare ankank Kwaro warákár moria kwatae akwapanoria nám te, maomp taun mek yak mo kareno.

Kwar ntia Sipsip Morokamp sia king te am taun mek yak naenámpon. Tá Kwaromp tére arop man lotu mwanapon.^k ⁴Tá am fárákap takria Kwaromp yimetáp nke mwanapon. Tá mao am fárákapamp yépe kor fek náráp e kukumwi naenámpon.^l ⁵Kirikip te warko korop mono. Tá Kwar Tokwae Kar mao saráp am fárákapan wae sánk naenámpara, lam wae, tá yámar wae warko tére mono. Tá am fárákapao king yaká yakáp mwanapon.^m

'Jisas te koupour ék naenámpono'rá sénám kar

⁶Tá ensel onan arakrá sér, "Mámá kar te waeman kare karonó. Ponankor arop fwap táman mér kare mwanapon. Kwar Tokwae Karao profet fákáreran náráp kar farákáp mwanap kwapwe kare ninik maomp ninik mek kákria, náráp ensel sámp-kérép nánko, maomp tére arop ponankoran wakmwaek koupour kar korop naenám ankank ponankor yékn námpono." ⁷Tá Jisaso sérrá, "Yumo wawenk! Ono yumonapok koupour kar korop nanae! Táte arop ankwap mámá buk fek yaknám profet kar wawia mántwaok nám te, Kwaro man ourour sánk naenámpon."

⁸Ono Jon ono am kar wawia, tá am ankank nke nampono. Ono wae wawia nkea pwarará, ono am ankank yéknám enselomp puk piká párákaprá man

ⁱ 21:27 1 Ko 6:9-10; Yé 3:5; 13:8 ^j 22:2 Stt 2:9; Ese 47:1,12; Sek 14:8 ^k 22:3 Yé 7:15

^l 22:4 Mt 5:8; Yé 14:1 ^m 22:5 Yé 21:22,25

lotu naeria. ⁹Aenanko maok, mao onan sérrá, “Amo taki kwapono. Ono te amo ntia waráp ankwapyaenáp profet fákáre, yumont nomo ankárankamp tére konámpono. Tá ono ponankor arop fárákap mámara buk fek yaknám karwaok i konap, maomp ankárankamp tére aropono. Aeno amo ankár Kwar ankárankampan saráp lotuampo.” ¹⁰Tá mao onan sérrá, “Mámara Kwaromp kar mámara buk fek yak nám te amo mek wouroump kwapono. Mono! Kwaro am ankank tére naenám ke te waeman wonae fik námpono. ¹¹Aenámpara, arop kwatae ninik i konám te, waeman ankár kwatae niniki nám támao yak naerámpon. Arop oumnám ninik i konám te, waeman oumnám ninik támao yak naerámpon. Tá arop yae-párak kare ninik i konám te wae fwap yae-párak kare ninik támao yak naerámpon. Tá arop yiki kukarrá yak nám te waeman fwap am yiki kukarea yaknám ninik támao yak naerámpon.”

¹²Jisaso sérrá, “Yumo wawenk! Ono te koupour korop nanampon! Tá ono kápae kare aropan nopok nénk nanamp tia korop nanampon. Aeria arop ponankor ankákárankrá ankank maoinap ninik puri fek nénk nanampon. ¹³Ono saráp ono mekia akwap, ono saráp wakmwaek kar yak nampon. Ono támao manénkir ankárank feknám pia akwapea wakmwaek kar pwar nám fekono. Ono te kápae kare ankank ponankor fi korara, ono ponankor térea pwar konampon.

¹⁴Koumteouráp arop fárákap náráp waempyam yárar korrá yakáp nap te, Kwaro man ourour nénk naenámpon. Am fárákap yiki yak sánknám yao ki fár mwanap te fwap pwi námpon. Tá am fárákap Kwaromp taun mek youmpnám ménki-páraok yink mwanap te fwap pwi námpon. ¹⁵Aeno asao i konám niamp ninik fek kápae kare kokopor i konap arop fákáre, foupou i konap arop fákáre, tá kokopor ninik i konap arop fákáre, tá arop tirá wour i konap arop fákáre, tá kwekár kwarén lotu i konap arop fákáre, tá arop ponankor kwekár ninikan warákárrá mántwaok i konap, am arop fárákap te Kwaromp taun mek tukup mo, ek yakáp mwanapon. ¹⁶Ono Jisas onomp ensel yumonapok sámp-kérép nanko pikia mao yumo sios fákáreran am kar farákáp námpon. Ono támao Devitomp yao arák fek taoi nampono. Tá ono maomp fi mekamp tarápono. Tá am térme Wap Kumur aokrá wae tákap konám te ono támaono.”

¹⁷Yiki Kor Spirit ntia Sipsip Morokamp yupu am anánkaopwerao sérrá, “Amo koropae!” Tá arop am kar wanám arop mao kor ankár sérrá, “Amo koropae!” Tá arop éntantá níkip nám kwamp te ankár koropano. Arop ént fánaeria nám kwamp te, ankár koropea Kwaro kwaporok sánk konám yiki yak sánknám ént am sámpano.

Jono mámara buk fekamp kar wanap aropan kárakáre fek sénámp kar

¹⁸Am profet kar mámara buk fek yak nám wanap arop ponankoran ono Jono kar kárakáre fek sénampon: Táte arop ankwap am fek ankwap kar ke paprá sérianám te, kápae kare kwatae niniki nám fek méntér tapokwapea mámara buk fek sénámp ankank kwatae tarapokwampia am

maomp pourouk akwap naerámpon.ⁿ 19 Táte arop ankwap mámá buk fek yaknám Kwaromp kar ankwapmwaek tirá épéri nám te, maomp yiki yak sámp naenám yao ki te Kwaro sámp-sinaerámpon. Tá mao te am Yiki Kor Taun mámá bukao sénám mek te youmpá yak naenám pourou mono.

²⁰ Am arop kápae kare ankank ponankor korop naenám farákáprá sénám arop támao oukoumwan sérrá, “Kare karonó. Ono koupour kar korop nanae.”

“Ye! Jisas Tokwae Kar, amo koropae!”^o

²¹ Ono ninik namp te, Jisas Tokwae Karaó námokuráp ninik fek yumwan yaewourria ponankor yumont yakanoria nampon. Am te kare takano.

ⁿ 22:18 Wkp 4:2; Yé 15:1 ^o 22:20 1 Ko 16:22; Yé 3:11